

攻

媿

集

四



會館圖書
申大

攻 媿 集
(四)

J
17.8
1,2005

樓 鑰 撰

攻媿集卷十四

今體詩

趙路鈴不枯輓詞

蚤歲游金闕。霞冠拜紫宸。可堪天寶亂。及見會昌春。宛宛王孫態。飄飄物外身。靈光愴陳迹。遺老更何人。諸父論交久。忘年許預盟。登山陪躡屐。泛月共飛觥。來往開三徑。安閒羨一生。山深淒薤露。愁憶醉歌聲。

姜總管浩輓詞

及見開元盛。曾聞正始音。雕蟲徒壯歲。冠鶡豈初心。論事風生席。疏恩帶錫金。精神空滿腹。愁絕病沈沈。富盛俄遭變。艱難卻起家。田園新活計。詩禮舊生涯。仙桂應傳秀。庭蘭更茁芽。真歸了無恨。超徹妙蓮華。祝通判鏐輓詞

坦坦曾無我。休休蚤見幾。虛舟寧忤物。抱甕自忘機。老去心逾壯。歸來事已非。賞延推不及。有子尙家肥。花縣弦歌化。蓮城水竹居。舊寮情意厚。近別信音疎。不作三刀夢。空垂別駕車。新阡何處是。東望倍欷歔。求參議子紹輓詞

累世朱陳舊。宦游多向鄞。飛鳧觀政美。展驥愈情親。久草歸田賦。欣迎入幕賓。斯人忽千古。望斷剡溪濱。

玉立期清貴。龐眉望壽齡。父兄嗟奄忽。姑姊亦凋零。厚德今誰在。佳城慘欲扃。孫曾聞競爽。蘭玉在階庭。

朱坡史居士輓詞

巖邑富人物。才惟史氏多。流傳有丹桂。遺逸嘆朱坡。學飽終難售。詩成祇自哦。空餘著書在。令子挹餘波。交友俱名士。儀曹禮意周。使華臨夏口。詩興共南樓。喜得江山助。還同汗漫游。更煩賢宅相。相與發潛幽。

戴縣丞機輓詞

小戴久仙去。何堪更哭君。舊遊驚昨夢。陳迹愴遺文。晚暮期相與。死生俄遽分。銘成媿贊德。揮淚望新墳。高士終爲籜。豈惟勾小稽。鸞鳳雖在棘。桃李自成蹊。官府資關決。儒流仰品題。定知餘慶遠。遺愛滿雙谿。

方輿化叔珪輓詞

廟乏著靴鬼。夢中言更明。起家尤感勵。爲吏極廉平。薦口聲名重。朝行去就輕。奏篇真確論。何日遂施行。鴈塔深論契。鷓班試著行。參亡聞易簣。越弔後除喪。支郡難留鄧。佳城久夢方。吁嗟德浮位。回施與諸郎。

戴迪功應龍輓詞

猶記天街會。同爲乳竇游。姻家頻會聚。親意愈綢繆。吉德宜多壽。奇疴竟不瘳。無由見安道。汎雪悵回舟。好學數仍奇。躬行家遂肥。時將詩自樂。晚悟世俱非。教子惟黃卷。高門看綠衣。阿連悲未泯。無淚爲君揮。

王通判瑛輓詞

世篤青箱學。驂駟更著鞭。半山分近派。巖壑誦新篇。竹馬迎雙鳥。棠陰憶二天。黃扉伸讜論。風節尙翹然。

才具盡時用。拂衣俄去之。善藏經世手。回施稱家兒。羸博延陵恨。人琴子敬悲。連年事如許。天道杳難知。
姜鍾離柄輓詞

門戶期興起。交朋務琢磨。反身求大學。決意取儒科。贊府聲尤著。鄰封惠亦多。傷心濠上路。無復聽弦歌。
別去期三載。倅來痛一書。死生誠大矣。力量果何如。平日真知我。遺言苦問予。作銘雖不愧。回首倍欷歔。

顧養直義剛輓詞

萬頃東湖下。曾門起大家。子孫昌世業。文字作生涯。堂後萱猶樹。庭中桂欲華。惜哉時不待。誰忍送悲筵。
舊向君家去。宜齋屢舉觴。人常誦諸顧。里不見他楊。身世驚春暮。湖山愴夕陽。園林未成趣。鷗鷺亦淒涼。

李度支嘉言輓詞

忽作堂堂去。門前雀已羅。夢隨彈指斷。事向蓋棺多。心繫六州鐵。身傾千丈坡。昏昏晝夜哭。奈此敬姜何。
孰匪同升素。君子我最親。詞章傳自舊。翰墨恍猶新。別去情逾篤。歸來迹遽陳。無從效經紀。悲結淚沾巾。

何司業伯謹輓詞

頃歲遊孤嶼。名門說二何。胡爲終壁水。自合上巒坡。器重連城價。心澄古井波。傳家衣鉢在。袞袞並儒科。
骯髒陽司業。作州如理家。源流知有自。悃愾信無華。方喜亨途遠。俄驚暮景斜。傷心傾蓋舊。何處望東嘉。

王遂安時敘輓詞

淮水古王氏。生平熟義方。三珠欣競秀。兩桂早聯芳。才大用何嗇。源深流自長。青氈傳令子。一箭取雙鷗。

問學自冰翁。詞章聳巨公。不慙循吏傳。真有古人風。捫蝨書猶在。飛鳧迹遽空。人琴悲子敬。三讀愴深衷。

周左司頤輓詞

從政心無愧。敢言人所難。精忠憂世切。清節照人寒。交臂失持橐。乞身終考槃。老成今已矣。西望淚洸瀾。

蘇江陰十能輓詞

萬卷蟠胸次。千篇秀筆端。朝行期奮迅。賢路竟艱難。雖號循良守。欠爲文字官。遺編幸無恙。留與後人看。

魯少卿皆輓詞

隸尊儀駕綴。脩然兩鬢斑。時清嗟歲晚。遊倦得身閒。人在羲皇上。經傳伯仲間。桂枝芳未已。何止倍燕山。

六十年間。登科者十人。

前輩風流泯。靈光獨巋然。指困推甲族。跪履記丁年。有子傷埋璧。惟翁亦蛻蟬。功名雖已矣。千載尙遺編。

陸郎中沅輓詞

壯歲聯雙捷。衰年困百罹。肉身心佛子。霜髮貌嬰兒。萬事幾樽酒。百年千首詩。浮生成夢覺。吾道竟何之。

梁仲蒼輓詞

從弟忝東牀。相從二十霜。人琴一何苦。冰玉兩俱傷。別久成今昔。歸來失老蒼。稽陰終反葬。西望倍淒涼。

延賞高三讓。殊科擅一鳴。元賓文未極。長吉記先成。妙語遺膏馥。玄談悟死生。行人痛埋璧。父子若爲情。人物如君少。相期上石渠。博文該四部。篤學富三餘。淚盡知無及。交深未覺疎。何時酌墳草。細讀茂陵書。

王檢正回輓詞二首

到處稱循吏。星軺復郡侯。威名致降虜。恩信感亡牛。省闕主公議。祠庭尋舊游。善人天不憖。愁絕峴湖秋。客授蒙傾蓋。朝參喜綴班。開藩才一水。去國遂千山。晚遇名方重。言歸鬢未斑。功名付諸子。含笑謝塵寰。

彭宣義

汝知子復之父輓詞

種德不在大。至誠天所親。但能存一念。何用活千人。經筭儒風遠。香山句法新。功名付兒輩。不必在吾身。籍甚清湘守。修名所在聞。宦途資畏友。家訓仰嚴君。歸路飛丹旆。長空慘白雲。生芻不成奠。揮涕想江濱。

朱婺州安國輓詞

治行古循吏。風稜眞諫官。鋤姦清遠徼。持重息羣讒。久弄趙堯印。重彈貢禹冠。去天纔尺五。惜不見長安。

莫銅陵堂輓詞

經學高餘子。躬行慕古人。儒風三葉秀。和氣一門春。台嶺漸摩久。銅官撫字均。庠東亡二老。凝望淚沾巾。

張泰州禮本輓詞

燕趙多奇士。如公名不虛。胸中九域志。筆底百家書。報國心尤壯。籌邊智有餘。功名竟齋恨。西望倍歎歎。

徐季節輓詞

公府推徐穉。山陽薦仲車。盛時遺此老。沒世竟窮廬。行道嗟無命。傳家幸有書。魯山終不識。撫卷倍歎歎。

周德遠輓詞

家世傳儒業。鄉邦聳義風。將迎無倦色。交友盡名公。太學飛聲早。浮生轉首空。怡如堂下月。猶照紫荆叢。
汝能之兄。

余永彥輓詞

戶外諸生屢。門前長者車。柳袍空自染。瓶粟竟無儲。隱行刑宗黨。清風照里閭。沈冥誰爲表。賴有子雲書。

李堯卿唐佐輓詞

里社久相從。知君陰有功。救人多藥喜。持論恥雷同。素業諸郎在。浮生一夢空。淒涼宋清傳。健筆媿河東。

方運使有開輓詞

聖主一見決。孤忠自致身。籌邊滿軀膽。處事掇皮真。氣直老彌壯。言高用未伸。留屯十二事。公論付淮民。

王觀國觀輓詞

晚識三珠樹。方知獨笑翁。舊游虧半面。遺恨想高風。小楷墨猶溼。殘膏澤未窮。梅花縞寒夜。埋壁衆香中。

沈朝奉雲章宜之父輓詞

相業富青箱。丁年稔義方。生兒有如此。與世遂相忘。終老三牲養。凌晨一炷香。浮休了無恨。流慶尙深長。

孫子才輓詞

身後名何用。人亡意愈深。蓋棺悲昨夢。掛劍答初心。潛德仍能發。遺言尙可尋。悼元情更切。接隴柏森森。
潘安仁懷舊賦。既興墓于戴侯。亦悼元而哀嗣。墳泉泉以接隴。柏森森以覆植。元謂道元。楊戴侯之子也。

梁運使輓詞

風月詩千首。烟霞宅一區。三年著朝蹟。一節值亨途。南海瞻遺塚。西門破老巫。才高不盡用。無地寄長吁。

翁府君輓詞

飢饉翁夫子。高才噤不施。牀頭癡叔易。夢裏阿連詩。德喪嗟何及。天胡弗憖遺。清風終未泯。吹折謝庭芝。

徐府君輓詞

孺子人如玉。功名不在身。死生齊物外。孝友篤天倫。已有傳家子。曾充觀國賓。他年芳五桂。傷不見靈椿。

魏監丞叔玠輓詞

元老餘風烈。優游挹美官。朝行喜銀艾。鄰好許金蘭。醫謾肱三折。生惟指一彈。難兄秋夜感。風雨舊盟寒。

族兄道州輓詞

出守春陵遠。相思瀟水深。精神雖滿腹。撫字亦勞心。人去成千古。書來失萬金。懷哉季公諾。已矣漢碑陰。

周太博汝能輓詞

雨漲雙溪水。風高五柳堂。論交成莫逆。撫事祇堪傷。訪雪無回權。面山空夕陽。亂鶯穿綠樹。誰復爲傳觴。

寧海駱君季友輓詞

古易人皆學。惟君志益堅。研朱滴秋露。讀簡斷韋編。空谷甘無用。佳兒尙有傳。清風誰得似。竹滿臥牀前。

臧溫叟春卿輓詞

白首行逾恭。鄉評敬此翁。心開上池水。氣襲舞雩風。禮貌諸公厚。聲華一瞬空。臧孫知有後。三世著陰功。

陸宣城梓輓詞

奕世承家學。諸公薦吏能。政傳花縣美。心與練江澄。易簣去何速。攀轅悲不勝。傷哉羸博葬。淚盡老延陵。

寧海劉君

次舉之父

輓詞

不識紫芝眉。空傳有道碑。義方真可法。闢室肯容欺。未覺山川改。深明晝夜知。薤歌慙不稱。冢子素能詩。

宋南雄价輓詞

二宋久云遠。遺風君庶幾。才華試文戰。政譽藹王畿。梅嶺方騰最。雪谿俄賦歸。情親今已矣。老淚不勝揮。

莫子執珪輓詞

樂有父兄賢。談經絳帳前。桂林孤素志。芹泮老遺編。小阮情何切。童烏業未傳。棹閒最崇篤。口口話齊年。

繆伯恭輓詞

我實由汪出。垂髫托外門。非惟拜先德。猶及見新婚。謹厚推鄉曲。恩慈篤弟昆。善人今已矣。餘慶在兒孫。

吳通判輓詞

一死交情見。鄉評重此翁。素車奔夕夢。繡被落天風。身任朋僚責。心忘尺寸功。毋書卓行傳。非介亦非通。

趙縣丞彥棠輓詞

玉立佳公子。哦松始戍瓜。拳拳飭邊瑣。寸寸畫江沙。慷慨志憂國。清修僧在家。送行詩尙溼。身世遽空華。

石通直

莊問純度之父

輓詞

籍甚新昌族。眞成萬石家。源流端有自。悃愾更無華。奉職冰同潔。持身璧不瑕。慶門傳未艾。蘭玉茁新芽。

胡監嶽祇敘輓詞

賦就八叉手。文高三折肱。青衫雙鬢雪。黃卷短檠燈。夢斷采芹水。神淒下馬陵。諸郎追五桂。洗眼看飛騰。

趙司戶琇夫輓詞

奕奕佳公子。詞場早策勳。願爲新進士。終屈病參軍。舊事成清夢。高標想斷雲。傷心桑落酒。無復到孤墳。

端明殿學士王公希呂輓詞

片言寤主上亨途。幾向專城佩左魚。羊陸遐衝雖坐折。高文宿憤竟誰攄。平時屢草千言奏。垂絕猶騰八

難書。漢殿履聲今已矣。兩州遺老倍歎歎。

短檠鐵硯用功深。萬卷蟠胸不輟吟。故國遁身來濟岱。壯年發藻向儒林。愛民利物平生事。憂國忘家一

片心。史館頃年陪潤色。挽公無路涕盈襟。

陳文恭公康伯輓詞

唐虞千載道重光。奕奕元臣任贊襄。謝傅風流冠江左。晉公威譽比汾陽。折衝曾不勞聲色。輔政惟先振

紀綱天意高高誰可問。坐令邦國歎云亡。
德量汪汪萬頃陂。直將去就佩安危。干戈雖在相尋日。休沐宛如無事時。奏罷未聞宮漏轉。歸來俄見哲人萎。哀榮終始誰能及。百世旌忠頌德碑。

王修撰輓詞

十載頻褰刺史帷。名卿風裁映紳綬。慶門共仰聯三鳳。禁路咸嗟欠一夔。神武衣冠終遂志。平泉花木總成詩。傷心積翠樓前月。斜入欄杆欲向誰。
賤子何能直一錢。夫君于我獨知憐。樽壘談笑幾侵夜。琴劍周旋不記年。此去空懸徐孺榻。重來無復孝廉船。百身願贖嗟何及。哀涕霑襟如迸泉。

何內翰溥輓詞

豪奪錦標天下聞。慨然有志整乾坤。諫坡論事言皆合。帝幄談經道益尊。千古高文在鼇禁。一時名士上龍門。經綸未究身先死。痛惜誰能作九原。

潘大卿輓詞

直上青雲不作難。壯年何事掛衣冠。功名已矣乖時望。風節翹然見歲寒。鴻去冥冥矰不到。蝶飛栩栩夢驚殘。傷心耆老今無有。留得遺編向後看。

張運使孝仲輓詞

惠周劍外與淮南。歸臥空山且避讒。宴坐幾年期不死。臨行一著信非凡。不應杜父東高閣。真使謝鯤居石巖。欲向西陵尋宿草。秋風何日送歸帆。

魏郎中熊夢輓詞

相公鐘鼎蔽詩聲。鯉也聞詩蚤得名。高隱碧谿心更遠。今遊湘浦句尤清。握蘭未足酬吾志。攬轡寧知老此行。今日哭君誰最切。山房門下老門生。

姜祕監師仲輓詞

文筆無勞巧剪裁。一時妙斲冠蘭臺。王楊仕宦曾相接。游夏淵源有自來。治獄心知有陰德。立朝人歎有餘才。功名回施與孫子。公亦何爲不豫哉。久聞政績最淮淝。鄧嶺循良親見之。梓里尙遺前日愛。棠陰還長舊年枝。釣璜方兆非熊卜。曳杖俄興梁木悲。千里佳城空望斷。他時歸哭峴山碑。

李公執輓詞

乃翁志欲臥煙霞。宅枕清江欲泛槎。心地共知容渤海。夢魂曾不到京華。伯魚久矣聞賢訓。魏子端能起外家。彌望三江梁下水。隴西德澤信無涯。未甘辛苦去朝天。故作逍遙陸地仙。老子平生萬事足。人間五福一身全。厭看日月同奔驥。擺脫塵凡等蜨蟬。重到江頭人不見。曉風吹淚忽潸然。

莫將仕隨輓詞

自歎清才久陸沈。晚從內典用工深。譚觀炯炯死生際。寧復紛紛利祿心。載酒今誰問奇字。遺經古亦勝黃金。十年契闊遽如許。老淚臨風自不禁。

樊運使光遠輓詞

代人作

妙齡便有老成風。孝友丹心天與通。師友淵源得西洛。文章聲價冠南宮。固知夫子才難用。猶喜先生道不窮。他日鳳泉山下路。幾人下馬拜塋中。

樊侯勳德佐中興。百世兒孫尙典刑。闔境民蘇御史雨。列城人仰使君星。憲臺嚴冷獨峩豸。道院清閒誰掣鈴。謠頌洋洋在人耳。不須樂石更刊銘。

戴縣丞樺輓詞

蚤歲鄉書薦弟兄。羨君再舉上清冥。藍田方欲新漫壁。處士寧知卻應星。忍向伯高將束帛。誰從小戴授遺經。佳城得卜真前定。忍看一翁衰淚零。

伍主簿景善輓詞

好賢元不減緇衣。客到公家如所歸。二浙聲名三鷄薦。四山風物一鸞飛。桑榆冉冉身先脫。蘭玉森森家正肥。人有百身寧可贖。發棠誰復濟齊畿。

由來風誼獨穹然。坐享家肥不計年。墮幘何妨分百萬。指囷寧復問三千。靈椿老矣仁宜壽。玉樹種成身

已仙。袞袞公侯殊未已。正應含笑入重泉。
晚年朋舊益凋零。歎絕斯人奠兩楹。不忍銜悲讀佳傳。可堪回首念平生。交情君獨全終始。人物誰能繼
老成。清些楚魂招不得。朔風淒切淚縱橫。

安恭皇后輓詞

天作周文合。禕揄禮可觀。屢陪金輦幸。幾奉玉卮歡。吳女簪新柰。梁房掩舊蘭。春深蠶事起。誰復上桑壇。
鬱鬱南山路。傷心鳳翼紅。哀歌淒薤露。祕殿掩椒風。故劍恩雖厚。中璫事已空。但餘彤史筆。內傳紀陰功。

又代人作

玉勝標祥兆。禕衣配至尊。柔儀高馬鄧。盛德邁娥嫫。鸞掖空陳迹。霓軒服厚恩。傷心臨七夕。素柰已花繁。
圖史懷規鑒。篇章妙剪裁。承歡方祕殿。委化已泉臺。曲壤湖濱秀。清笳日暮哀。未央當月望。不見翟車來。

齊國夫人曹氏

趙知宗之母輓詞

痛哭王孫去。南來萬里餘。解衣催艇子。扶杖擁籃輿。已矣空鸞鏡。誰歟得鴈書。辛勤立門戶。地下勿欵歔。
宗子今曾子。夫人古敬姜。邛邛承孝養。潄水刻恩章。湯沐封逾寵。芝蘭晚更芳。九齡天報遠。餘慶尙流光。

齊安郡夫人金氏

趙左司公頤之室輓詞

避地供湯餅。當筵接縞衣。倉皇奉神版。巖險遜征騏。遇事智尤敏。相夫家寢肥。考終無可憾。蝶夢遠芳菲。
五子俱英發。尤知仲氏賢。勤明真世濟。廉儉信家傳。別乘徑爲郡。高城欲捍邊。版輿俄棄養。事業待他年。

太淑人葉氏單侍郎妻之母 輓詞

婦職躬蘋澗。芳年誓柏舟。壺儀全肅睦。梵行極清修。貝葉開空性。神篋豁病眸。飄然指歸路。淨觀日西流。爲國生賢子。三遷備母慈。版輿崇色養。從橐勉論思。戲舞老萊子。平反雋不疑。孝心天罔極。腸斷蓼莪詩。

太令人趙氏王帥稱之母 輓詞

令德比鳩鳩。芳年誓柏舟。承歡猶有戀。曠達了無憂。方奉平反笑。俄成汗漫遊。哀榮誰得似。同穴樂哉丘。姻婭託三槐。同朝得往來。迎春煩設席。舉壽荷攜杯。京尹俄遭難。都人亦助哀。琅琅垂絕語。烈婦信高哉。

從姑太令人輓詞

伯祖八賢女。惟姑壽且康。又聞歌薤露。誰復是靈光。采藻空南澗。生萱愴北堂。平生好心地。持以遺諸郎。

太恭人劉氏王台州之母 輓詞

籍甚成天助。薰然藹婦容。家肥身愈約。福備禮彌恭。上壽九開帙。湛恩四受封。何人紀遺德。女婿正乘龍。衛氏一兒足。他人總不如。一麾欣義檄。千騎擁潘輿。台嶽傷歸旆。青山滿送車。佳城流慶遠。旁可萬家居。

太令人軒氏趙山甫母。自號覺菴居士 輓詞

緣斷身先隱。年侵鬢未華。死生猶曉夢。富貴更空花。佛祖親提印。兒孫競起家。無因拜靈几。一奠趙州茶。舊說蘇無著。夫人亦正宗。毒蛇橫在路。栗棘更無蹤。無著贊臨濟宗旨云。一條毒蛇。橫在路上。覺菴云。栗棘蓬。栗棘蓬。一口吞卻更無蹤。蕭散超塵

界。扶持禮紺容。覺庵誰嗣法。別去德雲峯。

太孺人蔣氏輓詞

之死靡他志。天乎不諒人。嫠孤蓬在首。艱苦棘成薪。晚福容千指。心空滅六塵。平生貞烈意。終作坐忘身。潤屋惟純儉。居然法度循。松楸先壟下。風月舊湖濱。子婦皆知孝。孫曾亦可人。浦江如可贖。真欲百其身。

孺人陳氏

周子及之母輓詞

教子推陶母。相望百代前。詩書經口授。名節誦家傳。藝苑高鴻筆。忠言徹細氈。源流知有自。何止父兄賢。令子齊年好。相從識壺儀。蕭生結綬日。孟母卜鄰時。未卜升堂拜。俄聞陟屺悲。天涯致芻束。淚落薤歌辭。太淑人管氏輓詞

彤史久不作。誰能有婦功。寧知貴家子。乃有昔人風。鈿軸恩何渥。芝庭澤不窮。死生無可憾。況已悟真空。

陳夫人

程吏部之母輓詞

作配知名士。周旋內則篇。宜家兼四德。訓子見三遷。就養榮方逮。歸寧病忽纏。慶源流未已。佳兆得牛眠。

張夫人

余元老之母輓詞

婦德天然備。肥家五十年。平生勤內則。晚歲識真詮。倒廩非徼福。翻經亦應緣。于門有孫子。佳氣藹新阡。

王夫人

羅尚書外祖母輓詞

婦德勝賢士。嫠居成大家。陰功宜有後。餘慶尙無涯。楊惲出司馬。陶潛傳孟嘉。文昌紀遺範。外氏倍增華。

恭人強氏

曾南仲之母輓詞

祠部源流遠。來嬪曲阜孫。事夫終婦道。訓子大吾門。頌誥恩光渥。升堂笑語溫。相期送丹旆。馬鬣近周原。

恭人董氏

劉侍郎顯之母

輓詞

敬饒尊夫子。升堂乳阿姑。鄉評推至行。家慶展新圖。半世悲鸞舞。高年樂鳳雛。蜜章應未艾。卿月應階符。

鹿夫人

同年應尉振之母

輓詞

內外言無間。初終志不移。白頭供婦職。彤管著賢規。慶衍珠三樹。芳先桂一枝。鳳岑歸去路。含笑不應悲。慶霈疏封日。姑慈不忍違。人方侈君賜。我獨避恩輝。孝篤神應勞。風高家愈肥。新傳快女壻。亦復掛冠歸。

旌表門閭安人陳氏輓詞

婦德高千古。鄉評徹九重。柏舟終自誓。石窋啓新封。孫子傳清白。閨門慕肅雍。死生無憾處。了不愧三從。族姓朱陳盛。夫人人事明。老姑俱上壽。難弟各清名。魯事良輪之姊節行輝彤管。門閭照赤城。室鄰方有託。何忍送銘旌。

盧夫人輓詞

名族著岡頭

武岡遠之姊

幽閨女教修。良人驚夢蝶。衆子慕桑鳩。物化了難問。壺儀誰爲收。于公有佳兆。袞袞

看公侯。

廿四從妹輓詞

姊妹二十四。凋零餘二人。他鄉忽傳訃。老子倍傷神。已歎罄居久。何堪逆境頻。佳城千里外。西望淚沾巾。

孝養全終始。眞成乳阿姑。衾禭長夜共。甘毳四時須。衆子俱傳業。諸孫足自娛。吾家女兄弟。似此亦幾無。去歲桐川弟。新從姊處歸。備言家慶事。猶著嫁時衣。尙欲尋松社。寧堪哭素幃。人生眞一夢。回首事皆非。

令人王氏

表兄陳左史之室

輓詞

嫁早仍知孝。夫賢自不貧。事姑如事母。憂物勝憂身。鳳誥恩榮渥。鳩桑德意均。孺哀聲不絕。淚柏不成春。宦達方資助。家肥忽悼亡。一區終異室。千載尙高岡。奉倩神猶慘。安仁髮欲蒼。黃昏愁絕處。誰伴紫微郎。

宜人楊氏

鄭華文之室

輓詞

里閨依楊氏。年家託鄭門。升堂從壯歲。擇壻得賢孫。婦德儀中壺。陰功燕後昆。尤憐吾女子。流涕說慈尊。夢入枌榆社。心游水竹灣。句歸期拜壽。近侍望承顏。一昨聞微恙。寧知竟大還。佳城無路到。夫婦淚俱潸。

陳夫人輓詞

族姓甲休陽。夫人懿範彰。奇男已南省。快壻更東牀。珍錫人加嘆。佳城神所藏。平生陰德在。餘慶尙難量。雅有幽閒操。來嬪清白家。相夫全禮敬。見子致清華。方享承軒樂。俄興陟屺嗟。誰將彤史紀。大筆爲雄誇。

碩人居氏

蔡尙書之室

輓詞

頃侍尙書坐。曾聞闔助賢。晤言成勇退。裏謁戒私專。夢斷松江路。神傷薤露篇。悼亡千里淚。疊嶂想新阡。

江。 葬于平

王夫人

周子及之室

輓詞

閨內誰無助。夫人事特明。傾囊資色養。勉學就清名。遞世期高節。辭風歎落英。丁寧猶在耳。伉儷若為情。荆國風流遠。幽閨女教循。鶴原驚逝水。鶴髮倍沾巾。厚夜招香魄。英詞列翠珉。祗愁書字拙。貽笑衛夫人。

王夫人陳少南之室 輓詞

淑質依名士。身期百不憂。葦砧家萬里。蓬首日三秋。陶母傳遺業。嵇孤託舊遊。幽原誦詩傳。無媿柏為舟。

王夷仲夫人輓詞

彤史無人續。誰能識壺儀。蘋蘩奉先祖。詩禮付佳兒。未見魚軒樂。俄興鸞鏡悲。葦砧方得路。腸斷悼亡詩。

盛夫人輓詞

婉孌閨中秀。清高林下風。相夫能盡禮。教子使移忠。邊郡官無曠。都城養得終。壺儀今具在。流慶復何窮。

恭人胡氏陳奉直千能之室 輓詞

懿行表閨房。情親共盡傷。繡衣來宅相。彤管著銘章。劉提舉誠之為作銘 蘋澗誰供祀。葦砧空悼亡。芝蘭俱秀發。所

恨失元方。先喪其長子

宜人聞人氏趙婺州之室 輓詞

四郡歌賢牧。魚軒從隼旗。深閨無裏謁。色養謹安輿。故里稱家法。諸郎讀父書。美哉彤史筆。三誦為欷歔。

宜人史氏輓詞

閎闕冠三朝。尊公兩珥貂。夫賢能盡禮。家貴肯期驕。教子門風振。澄神性地超。悼亡無可憾。直筆付孫樵。

安人鄭氏輓詞

勤儉佐家肥。猶齊舉案眉。錦封俱被寵。鸞鑑可勝悲。謝砌森羣玉。邳林先一枝。木華文雋麗。銘德粲堂碑。

木簷事
為銘。

孺人錢氏

丞相之女
適曹氏。

輓詞

家世戟如林。來嬪藹德音。功容俱可度。疾疹遽相侵。已矣空蘋澗。誰歎助葦砧。佳兒隨玉折。尤切悼亡心。

孺人林氏

盧彥德
之室。

輓詞

家世甘泉舊。幽閨有令名。賢明教陶侃。勤苦佐淵明。蘋澗今何處。鳩桑空復情。誰知悼亡意。揮涕望佳城。

孺人曾氏

葉寺正
之室。

輓詞

婉嫵應眉壽。天胡弗與齡。情深孫楚詠。淚盡女孥銘。蘋藻空南澗。芝蘭有謝庭。越山埋璧處。秋雨溼銘旌。

信國夫人秦氏

林子長
之母。

輓詞

夫人富貴出懷紉。擇配和鳴得仲卿。鸞誥早能封大國。魚軒不及伴雙旌。肥家得法晚無倦。教子登科新有聲。歎息南谿未成屋。鳳凰山下啓佳城。

茅夫人

鄭貴虛
之母。

輓詞

清心玉映許誰同。更有飄飄林下風。政爾高情協宗老。故宜嘉遜樂龐公。遠謀蚤識身為重。晚境還知性亦空。已擬張林碑婦德。合歸彤史巨編中。

孺人陳氏輓詞

追憶宮端舊典刑。三貞況復是難兄。豈惟門戶生光彩。直使朝廷列姓名。煙海乘桴誰可奪。天風反火報尤明。雖云弟姊相從去。自有英靈凜若生。

太碩人潘氏

葉尙書書之母

輓詞

玉暎清心著壺儀。閨房賓敬到齊眉。豈惟山水協高趣。

宗少文每遊山水。往輒忘歸。妻羅氏亦有高情。與少文協趣。

更爲國家生好兒。

太宗賜張文定齊賢母詔曰。婆婆有福。生得好兒。爲國家分憂。

萬口共推諸福備。八旬猶負一年期。伯仁冬日應腸斷。不見堂前舉酒時。

攻媿集卷十五

表牋

請舉樂

皇帝第一表

春秋重改元。法蓋先于五始。君子不爲樂。古無越于三年。請爲王言。冀同民樂。中謝恭惟皇帝陛下。系隆列聖。娛侍三宮。綿宇屬心。旣極謳歌之戴。重華盡孝。適承遇密之餘。顧烈祖之報。厚且重焉。然文孫之制。期已久矣。況復高廟卽安于神御。壽皇俯和于祥琴。下逮都人。悉除樂禁。新王春而建號。進寶冊以歸尊。願飭攸司。各揚乃職。鏘八音而應律。肅萬舞以充庭。仰奉重親。益見慈顏之喜。下孚衆聽。普臻和氣之祥。

擬第二表

睿主承休。光啓太平之運。王正肇始。益新治世之音。爰伸百辟之誠。未動九重之聽。游陳奏牘。進冒宸旒。中謝恭惟皇帝陛下。仰紹心傳。率循家法。念德壽詒謀之重。體重華盡孝之勤。旣居崇高富貴之尊。未聞文采節奏之美。聲音不足于耳。豈爲是哉。禮樂不可去身。有爲貴者。雖聖帝尙深于餘慕。而禮經尤務于適中。莫先鳳唳之頌。宜上龍樓之奏。豈止君臣相悅。第成徵角之詩。將與天地同流。益致形聲之應。

至尊壽皇聖帝第一表

高蹈萬乘。聿重協帝之華。躬行三年。曲盡慕親之孝。矧將陳于冊寶。盍備舉于樂章。爰率具寮。仰干淵聽。
中謝。恭惟至尊壽皇聖帝陛下。怡神于淡游物之初。惟付託之得人。宜燕頤而養性。方且羹牆在念。疏素以居。既已光舜禹之傳。乃親爲會。閱之行。期可已矣。必欲加隆。祥而廓然。尙云寧戚。顧平時不好世俗之樂。豈今日忍聞堂上之歌。然而和琴俯就于成聲。鑽燧再經于改火。不應慈極。尙遏諧音。伏望酌先王制禮之中。念聖子承顏之養。居處笑語。寢寬追遠之思。鐘鼓筦絃。益致導和之美。

第二表

三年執禮。已經徙月之期。五日受朝。當備鈞天之奏。援彝章而有請。闕兪旨而未頌。事恐久稽。義須再瀆。
中謝。竊以帝舜既命大禹。猶欲六律五聲之聞。漢皇上壽未央。亦以萬歲大笑爲樂。蓋已膺天下之養。盍具舉朝廷之儀。若稽舊章。允屬盛際。恭惟至尊壽皇聖帝陛下。道高物表。德邁古先。既全與子之明。尤盡因心之孝。謂太宗就簡。遽爲三十六日之期。而晉武欲爲。莫起數百餘年之陋。出于獨斷。高掩前聞。羣臣仰體夫聖心。薦歲忍形于奏牘。迨茲卽吉。乃敢發端。既已遏音于三載之餘。正當成歌于十月之後。況卜元正之吉。將新徽號之隆。儻非廣奏于和聲。何以崇成于緝典。恭聞南內。將騰聽樂之章。欽想東朝。亦望承顏之樂。仰祈睿旨。俯徇輿情。

擬第三表

游貢封章。祈舉九成之奏。未承誥命。敢稽三請之勤。中謝。恭惟至尊壽皇聖帝陛下。高視帝尊。共爲子道。自畢因山之奉。已合外除。靡從越紉之權。竟全終制。遠復先王之法。肯循後世之常。迨其今兮。何以尙此。至矣盡矣。願聞大舜之詔。儼如釋如。當語太師之樂。雖欲勿用。其將何辭。濟濟羣賢。傾聽笙鏞之間。欣欣百姓。喜聆管籥之音。

擬壽聖皇太后牋

三載遏音。已全于中制。兩朝就養。當備于和聲。中謝。恭惟壽聖皇太后殿下。德並娥。莘行齊任。姒佐中興之業。協濟艱難。贊內禪之明。共安閒燕。比驚慈辰。忽返帝鄉。乃安長樂之居。密受重華之養。神孫御厯。寶冊陳儀。豈應迎年。而不爲樂。琴瑟之友。鐘鼓之樂。諒未忘儷極之思。羽籥之器。綴兆之文。願俯徇輿情之請。

賀正日

皇帝表

歲必履端。蓋重四時之首。年初建號。有光二帝之傳。矧慶事之鼎來。效羣臣之善頌。中賀。恭惟皇帝陛下。乾剛行健。離照繼明。正月之吉。始和春祺。旣集四海之內。咸仰王化。方行當周家布政之時。迺漢曆改元之日。喜瞻萬乘。上寶冊于三宮。肅領千官。奉玉卮于前殿。偕備琚瑀瓊璜之飾。創聞鐘鼓管籥之音。益知嗣德之在初。孰謂太平之無象。開八荒之壽域。登庶俗于春臺。臣猥預周行。欣逢穀旦。方千里者九。想同

望于堯雲。呼萬歲者三。敢競伸于虎拜。

至尊壽皇聖帝表

歲之朝。日之朝。方肇新于鳳曆。尊之至。養之至。爰啓慶于龍樓。歡動宮闈。澤均海宇。中賀恭惟至尊壽皇聖帝陛下。位居慈極。仁冒羣生。一道心傳。六通四闢。于帝王之德。三登化治。上際下蟠。于天地之間。乃釋萬幾之繁。坐受九重之養。惟時上日。尤異常年。聖子改元。著遵制揚功之意。昕朝奉冊。見歸美報上之誠。八音克諧。四方來賀。豈特履端之可慶。誠爲曠古之未聞。臣等恪謹鳧趨。伏深鼇抃。願方訪道于崆峒之上。正當儲神于螭護之中。何止八千春以大椿而爲久。敢祝三萬歲。願慈母而亦然。

賀三宮受冊

皇帝表

乘翠鳳之車。講盛儀于元日。鑲白玉之牒。上徽稱于重親。慶事旣成。綿區交賀。中賀恭惟皇帝陛下。與天同大。如日方中。克寬克仁。允協成湯之德。惟精惟一。密承虞舜之傳。爰奉三宮之歡。以垂萬世之則。討論故實。備極崇高。視慈福之鴻名。皆有願聖人壽之祝。侈重華之顯號。尤彰爲天子父之尊。當遲日之載陽。喜積陰之頓解。雨師風伯。旣已肅清。乾端坤倪。爲之呈露。雲移天仗。首趨漢殿之朝。星拱玉皇。親下堯階之拜。歡聲相和。叶氣橫流。惟天人順應之甚明。知社稷靈長之可卜。臣等幸緣際會。獲奉周旋。快覩聖時。允屬紹熙之始。願隆孝治。一如貞觀之初。

壽聖皇太后牋

涓嗣歲之端辰。上丕天之太號。神孫具禮。親來翠蹕之朝。聖子承顏。同受雕珉之冊。中賀。恭惟壽聖皇太后殿下。行齊任。妣德邁。姬莘蚤輔中興之功。載裨內禪之策。由長秋而登長樂。安榮已見于無加。自紹興而至紹熙。戩穀益知其未艾。惟壽居五福之首。而聖乃羣倫之先。永年常奉夫母儀。今日尤嚴于祖后。禮容甚盛。鼓舞惟均。臣等獻歲云初。趨班惟謹。得少廣之道。本無迹之可名。居東朝之尊。祈後天而難老。

壽成皇后牋

萬乘來朝。當夏時之上日。三宮受冊。列文母之丕稱。覆載兩間。歡呼四起。中賀。恭惟壽成皇后殿下。謙恭素稟。柔懿內充。奉慈極之天顏。曲盡問安之禮。佐壽皇之內治。克全燕翼之謀。禮既備于尊崇。心益安于沖淡。共都顯號。爰歸父母之尊。仰嗣徽音。尤侈婦姑之盛。俱以壽康而嚮用。何勞警戒以相成。臣等欣際休期。獲觀緝典。詠思齊之什。維周匹休。安長樂之居。與宋無極。

皇后牋

羽蓋翟車。陪六飛之法駕。瑤編寶刻。上三殿之隆名。既備盛儀。式昭內助。中賀。恭惟皇后殿下。處心淵靜。迪德懿恭。五日受朝。常謹問安之奉。九重視膳。每言佐餽之勤。迨茲穀旦之禮成。想見長秋之喜倍。尚須浹日。嗣舉從容。堯舜相傳。禹方循于一道。姜任在上。妣宜續于徽音。臣肅領廷紳。預觀國典。展宮中之賀。諒無異于外朝。奏堂下之音。爰助成于和氣。

賀皇后受册

皇帝表

九重渙號。實遵慈辰之謨。萬乘臨軒。爰授中宮之册。肆稽故實。備著禮容。竊以地本法天。方著順成之德。月惟遡日。遂參久照之明。況居大寶之尊。盍正內朝之助。天作之合。王假有家。中賀。恭惟皇帝陛下。道貫三才。愛均四海。親承付託之重。允資輔佐之賢。若時元妃。作配龍潛之際。儷我宸極。有開熊夢之占。誕布玉音。進登椒掖。贊侍膳問安之孝。盡求賢審官之思。臣等恪領廷紳。預聞國典。乾坤定矣。式符義畫之文。鐘鼓樂之。願繼周南之詠。

至尊壽皇聖帝表

神器有傳。俾正椒房之號。緹儀告備。肆頒寶册之嚴。化浹綿區。慶歸慈辰。中賀。恭惟至尊壽皇聖帝陛下。德參覆載。道極範圍。堯治民以治民。有光前烈。天與子則與子。啓佑後人。乃當命禹之初。首眷嬪虞之舊。用修陰教。以正人倫。鳳蹕來朝。副以翟車之盛。龍樓問寢。加之禕服之華。臣等依附末光。相成鉅典。仰遵睿訓。見正家正國之規。鞏固皇圖。知卜世卜年之久。

壽聖皇太后牋

神孫御極。蚤正于長秋。天仗充庭。用揚于顯册。事關宗社。歡動宮闈。中賀。恭惟壽聖皇太后殿下。氣毓沖和。性資淵靜。化行南國。正萬世之彝倫。尊處東朝。受兩宮之孝養。屬涓穀旦。首上隆名。既先慈福之儀。旋

講穆清之禮。含飴示愛。見寶曆之親傳。佐餽得人。想慈顏之有喜。臣等駭奔在列。鼉抃惟均。家法相承。咸仰徽音之嗣。母儀有則。益觀王化之基。

壽成皇后牋

坤柔而剛。既參內禪之策。婦聽而婉。俾正中闈之儀。中賀。恭惟壽成皇后殿下。邇日爲明。與天同大。贊至尊之孝治。一紀于茲。安長樂之宴居。萬年有永。謹二南之正始。備四德以相承。懿典告成。慈幃胥悅。侈家國非常之慶。實社稷無疆之休。臣等獲際昌明。不勝鼓舞。友琴瑟而樂鐘鼓。莫先儷極之賢。本夫婦而始后妃。茲實齊家之要。

皇后牋

榆翟禕衣。久正內廷之禮。金寶玉冊。式全昭代之儀。慶衍宗祚。歡同宮掖。中賀。恭惟皇后殿下。肅雍成禮。柔靜資生。蚤開墜燕之祥。允協維熊之夢。躬儉節用。致君子之家肥。順色承顏。化天下以婦道。爰自御圖之始。允資儷極之賢。稟命慈皇。歲儀穀旦。是謂人倫之至。益彰女則之嚴。臣等目覩彌文。欣逢盛際。關雎麟趾。既已先正始之基。周姜太任。當無媿思齊之聖。

謝賜春衣表

春日載陽。肆頒于命服。上恩難報。仰謝于皇局。列辟同辭。闔門受賜。中謝。恭惟皇帝陛下。業隆潤色。道廣旻幃。大舜之垂衣裳。蔑以加此。神禹之美黼冕。吾無間然。迺俯念于廷臣。仍舉行于時令。爰賁以帛。俾華

其躬視爵秩而有差。被寵榮而如一。臣等敢不退揣其分。思稱所蒙。慕召南在位之風。期厲羔羊之節。效齊國老人之語。請遺天下之衣。

賀會慶節表

紹興三年。以左史攝西掖待班。扈從。有旨百官詣重華宮拜表。時禮部郎已在北宮候迎駕。左相留公。請就殿廡中作。今附于此。

虹渚發祥。爰紀生商之旦。龍樓啓慶。敢伸戴舜之誠。中賀恭惟至尊壽皇聖帝陛下。游物之初。怡神于淡。六通四闢于帝王之德。聿成盛治之勳。上際下蟠于天地之間。罔匪春和之氣。徧寰區而蒙福。與太極以同功。禮奉玉卮。遠循漢殿之制。書陳金鑑。何待唐臣之言。臣等肅領鷄行。恭舒虎拜。祝南山之萬壽。睿算無疆。效嵩岳之三呼。歡聲旁洽。

攻媿集卷十六

表牋

謝温州到任表

起家爲郡。俄及成時。便道之官。已共侯度。戴容恩而甚厚。宣德意以具乎。中謝。伏念臣一介書生。累朝世祿。當聖主飛龍之始。偶玷末科。筵明時振鷺之班。每安平進。久預憲章之筆削。屢參史牒之編摩。嘗佐治于偏州。復勾稽于列寺。天府式邦財之重。司宗書帝系之繁。比終素鞶之期。忽冒朱轡之寄。惟此東甌之勝。實爲左浙之雄。頃任冷官。茲叨假守。山川如故。風俗粗諧。雖無竹馬之迎。頓起蒲鞭之望。以前日待諸生之意。加惠斯民。于此邦揚泮水之波。廣爲膏澤。要令上下俱無所苟。且庶幾田里寢銷于歎愁。茲蓋伏遇皇帝陛下。深軫黎元。敷求長吏。謂臣游登王國。必能弘惻怛之仁。念臣四對天顏。固無俟丁寧之諭。是以左符分界。不待朝參。嚴旨趣行。免加臨遣。幸遂養親之志。實勤戀闕之私。臣敢不律已奉公。平心待物。惟忠惟孝。誓堅終始之誠。濟猛濟寬。務勉中和之政。

謝中書舍人表

史筆屢書。深慚無補。綸闈久假。遽命爲眞。嘗控避而弗俞。竟周章而就列。中謝。伏念臣受才譴薄。涉世闕

疎偶承累葉之儒科。寢預清朝之官使。往分郡寄。何有民庸。當壽皇御極之時。曾四登于文陛。逮聖主臨朝之始。遂三入于脩門。首汗郎省之聯。旋備賢關之式。貨泉出納。粗謹攸司。寶牒纂修。伏尋故步。晉班左城。攝事西垣。記注非工。有媿螭坳之直。詞章至陋。殆爲鳳閣之差。矧執愚之不移。或遇事而輒發。妨賢已甚。忤物且多。方喜懼之交懷。恐顛躋之未免。力求引退。敢覲褒升。才思欲枯。安得湧泉之敏。身章增煥。更貽濡味之譏。茲蓋伏遇皇帝陛下。翕受羣言。旁招衆俊。謂臣粗親小伎。故使當訓誥之司。察臣素稟樸忠。或可效涓埃之助。考于詳試。有此誤恩。臣敢不思稱所蒙。益共乃位。言惟作命。少裨雷風鼓舞之神。忠以事君。當謹朝夕論思之職。

謝壽皇聖帝表

柱史充員。久虞幽黜。詞臣掌制。遽忝超除。揣陋質以無堪。望慈宸而知幸。中謝伏念臣頃叨末第。已出異恩。再玷周行。惟自安于平進。仰承清問。嘗屢貢夫愚忠。出分海嶠之符。入就星曹之列。聖作明述。親見盛時。年除歲遷。寢塵清貫。書言書動。慙無載筆之功。如絲如綸。徒積代庖之媿。將以外庸而自詭。乃叨親擢。以爲真退。省僥逾益。增戰栗。茲蓋伏遇至尊壽皇聖帝陛下。達源繫表。探蹟古初。齊聖廣淵。居域中之有大危。微精一爲天下而得人。式詒燕翼之謀。茲見儲才之效。肆令么嚚。猥預論思。臣敢不深念遭逢。誓堅操守。仰戴兩朝之眷。敢務苟容。願殫千慮之愚。以伸忠報。

謝給事中表

充員詞掖。久懼罔功。進職瑣闈。忽驚誤渥。辱訓辭之甚寵。揣分量以奚堪。中謝竊惟封駁之司。實關出納之要。詔敕之布。咸仰君相所爲。有唐則許塗竄而奏還。本朝則令詳酌其可否。宜求人望。以贊政經。豈伊妄庸。乃與詮擇。伏念臣迂愚自信。執滯不通。秉筆螭坳。固有慚于良史。演綸鳳閣。曾何取于陳言。屬兼直于禁林。幸親逢夫輿運。書詔填委。靡容晷刻之淹。號令流行。欲助風雷之迅。僅無乏事。安敢辭勞。荷簡記于宸衷。俾驟膺于夕拜。不改北門之舊。旋仍東觀之華。加賁身章。增光從橐。茲蓋伏遇皇帝陛下。勵精初政。垂意羣才。用舍之間。初無適莫。論奏或至不吝改。更知臣備歷險夷。竊有愛君之志。謂臣素懷慙直。願殫論事之忠。遂致孤蹤。亦叨隆委。臣敢不俯思幼學。務勉後圖。親年益高。但有歸耕之意。主恩未報。尙希批勅之風。

謝權吏部尙書表

充員瑣闈。自顧罔功。攝長銓衡。忽蒙誤寵。仰皇慈之至渥。揣微分以何堪。中謝竊以選部持衡。夙號六卿之長。文昌聽履。實爲八座之聯。非素推公方。不足以杞吏姦。非妙有德望。不足以壓輿論。雖黃散之下。無忝異同。而搢紳之流。鮮不關繫。宜求精敏之彥。以當要劇之司。伏念臣才不逮人。學徒泥古。一爲支郡。三入脩門。久侍上皇。愧愚忠之無補。親逢嗣聖。荷褒擢之有加。代言非陸贄之工。批勅謝李藩之器。俯徇芻蕘之論。屢寬鈇鉞之誅。去省眼者五年。遂躡登于冢宰。離班心者一載。遽首列于後臣。禁林兼內制之文。史館涉信書之筆。滿盈已甚。控避莫回。頒御府之襲衣。益之繫帶。駕天閑之良馬。覆以雕鞞。但喜悅親之

私敢云稽古之效。茲蓋伏遇皇帝陛下多能天縱。盛德日新。蒐舉異才。踵登持橐之選。優容棄物。獨負吹竽之慙。宜黜而遷。以榮爲懼。臣敢不深思僥冒。勉竭疲庸。爲山公啓事之書。知非所及。守崔亮停年之格。何足言勞。尙幾典選之平。少助官人之道。

謝兼侍讀表

升班文部。方虞典選之難。進讀露門。更辱兼官之寵。循牆莫避。據蒞是憂。中謝竊以帝王之興。必以學問爲急。如懷素元量之選。本爲覽史之資。由宋綬夏竦以來。始有讀書之職。仰惟睿聖。光紹炎圖。首開講帷。詳延從橐。攷邇英之舊。加賜坐以甚優。于共膳之餘。俾侍言而更入。首閱三朝之寶訓。次觀先正之奏篇。宜求鴻博之儒。以助緝熙之學。如臣至陋。涉世多艱。豈期累歲之推遷。寢歷明時之華要。詞垣翰苑。代王者之敷言。史觀經筵。極書生之榮遇。況從夕拜。擢置天官。朝入君門。方被宸綸之渥。暮歸私室。又驚渙汗之頒。是何遭逢。有此僥冒。茲蓋伏遇皇帝陛下。勵精庶政。垂意多聞。廣廈細旃。許奉清閒之宴。哀衣博汗。不違咫尺之顏。自古所稀。于今獨盛。猥令未至。躡冠羣賢。臣敢不紬繹舊章。勉圖微效。海涵天覆。或容草芥之忠。日往月來。庶有毫釐之補。

謝顯謨閣直學士知婺州表

典選無聞。方上便親之請。承流已試。載叨出守之行。寵躋延閣之班。增貢輔藩之寄。祇膺明命。倍激危衷。中謝伏念臣奮迹孤單。逢時休盛。昨自東嘉之收召。尋登左省以推遷。代言慙潤色之工。封詔乏塗歸之

效及夫紬書視草。勸講掄材。皆儒者之至榮。豈生平之敢望。鑿誤恩而踰分。致私室之捩災。重貽慈母之憂。益動故鄉之念。力祈閒退。仰賴矜從。俟邦分寶。藝之區。學士寓文謨之直。繇常伯而出。于故事或有此除。考公論之歸。在小臣恐非所稱。莫遂循牆之避。徒深戀闕之誠。茲蓋恭遇皇帝陛下。覆育羣生。敷求長吏。察臣昔當一郡。拊摩羸竭于微勞。念臣今歷三朝。進退欲全。夫素守俸司。乃牧。俯便其私。臣敢不欽服。訓詞益思砥礪。五百里曰甸。不違咫尺之威。二千石惟良。少展涓埃之報。

謝中大夫表

由選部以守藩。方陳祠請。因年勞而進秩。更沐綸言。祇拜以還。感銘何極。中謝伏念臣生逢聖主。世受國恩。雖歷仕累朝。宰相繼百年之外。而傳家三葉。俱弗踰六品之階。敢期後嗣之微。乃越先臣之舊。共承遺訓。未知聞詩聞禮之言。追仰前蹤。徒有慙長慙卿之誚。豈特一門之幸。實爲千載之逢。茲蓋伏遇皇帝陛下。優待臣工。仍嚴銓法。三年考績。既容賞典之參。一體疏榮。爰示禁途之寵。臣敢不激昂素守。銜戴隆知。漢議方興。媿乏倪寬之對。淮陽既遠。敢忘汲黯之忠。

謝提舉江州太平興國宮表

分共理之符。敢起一麾之嘆。廩祝釐之祿。終僉三請之辭。盡出上恩。獲伸素志。中謝伏念臣稟資至陋。涉世最疎。誤蒙三聖之知。寢躡六官之長。輟金華之講。而爲金華之守。曲從外補之求。由學士之直。而寓學士之班。仍冒親除之渥。已過家而上冢。將叱馭以登途。屬以母老易危。暑行致疾。羣醫俱試。百口相驚。亟

上需章。謂必嬰夫嚴譴。首班溫詔。乃許緩于官期。感泣之深。憂惶實切。率更旬浹。又露忱衷。特寬方命之誅。竟允奉祠之願。仰隆私之過厚。誠近代之所無。去魯行遲。難效齊邦之接浙。報劉日短。幸容李密之陳情。茲蓋伏遇皇帝陛下。仁本愛人。孝先錫類。凡加識拔。舉無簪履之遺。苟有懇祈。俯詢芻蕘之賤。使退安于貞館。得娛侍于慈闈。臣敢不銘著肺肝。躬陳菽水。況此塵勞之久。少休疲曳之餘。凱風自南。獲遂奉親之樂。衆星共北。誓堅報主之心。

賀重明節表

慶元元年

述者明。作者聖。方兼備于孝慈。一曰壽。二曰康。宜大來于瑞慶。茲逢誕節。倍激忱衷。中賀 恭惟太上皇帝陛下。玩道希夷。儲神夔漢。尊居特室。成三朝脫屣之高。坐閱皇齡。受萬歲奉卮之養。功隆太極。事越古初。當今賓鴈之時。際此流虹之旦。慶綿宗社。歡動宮闈。臣久玷從班。適叨外補。天街簇仗。莫陪豹尾之中。海嶠傾葵。仰望龍樓之表。

賀瑞慶節表

神筴紀元。方懋繼承之烈。流虹啓瑞。載逢震夙之期。凡屬照臨。率均抃舞。中賀 恭惟皇帝陛下。聰明冠古。厯數在躬。纂列聖之不圖。謹三宮之色養。益仰守成之美。日聞典學之勤。良月就盈。爰輯大來之慶。後天難老。坐隆不拔之基。臣竊食祠宮。馳神天陛。修菽水之敬。既諧穎谷之私。奉香火之緣。敢效華封之祝。

謝再任宮觀表

祠庭既廩。其命維新。敕牒臨門。從天而下。恍不知其何自。凜欲受以猶驚。仰惟異恩。敢不祇拜。中謝伏念臣才非適用。學不知方。幸逢熙洽之朝。寢冒清華之選。四載預論思之列。無補毫釐。平時于出處之間。盡分尋尺。始因請外。亟畀輔邦。旋以便親。力求貞館。塵瀆蓋高之聽。俱蒙從欲之仁。繼辱簡知。再叨共理。不圖出守。乃復一麾。來者猶可追。惟闔門而退省。觀其所以養。敢謀食以自營。重尋香火之緣。盡出冕旒之眷。惟慮阜棲真之勝。自熙陵紀年而來。竊祝釐之虛名。得與釜之實惠。喜同毛檄。歡動萊衣。茲蓋伏遇皇帝陛下。覆載無私。照臨丕顯。選擇紳之髦士。咸與明揚。念簪橐之舊臣。未嘗終棄。賦以斗升之奉。增以儋石之儲。臣敢不益體洪私。誓堅晚節。爲子華之母而請粟。寧待人言。班周室之祿。以代耕。實銜君賜。

賀皇子降誕

皇帝表

天啓昌期。方侈三宮之慶。國生元嗣。實隆億載之基。溫詔四馳。驩聲一律。中賀竊以本朝之傳列聖。古所未聞。長嫡之出中闈。今方再見。況五世高曾之上壽。當三朝揖遜之盛時。首開長發之祥。益茂無疆之祉。恭惟皇帝陛下。仁霑動植。德冒華戎。堯帝聰明。既親于九族。周家忠厚。宜見于百男。爰稽熊夢之占。允協燕祿之吉。事關宗社。喜浹穹祇。臣頃玷從臣。幸休真館。拜殿陞之名表。莫綴鴛班。誦朝廷之德音。敢同鼇抃。

太上皇帝表

尊居慈辰。方均萬國之歡。慶篤神孫。益衍四朝之盛。宮闈喜溢。海宇恩深。中賀竊以漢甘露中。嘗有甲觀命名之愛。唐開元際。亦稱三日臨澡之儀。曾未有視黃屋以非心。見綠車之載育。恭想天顏之悅。咸欣帝系之昌。恭惟尊號太上皇帝陛下。道體純乾。功參太極。傳神器而與子。爲天下而得人。仁聲素洽于編民。福祚遂綿于世嫡。克岐克嶷。含飴自適于聖情。曰壽曰康。戲綵愈隆于色養。臣曾從屬車之後。遙瞻特室之嚴。奏未央五日之朝。阻陪下列。效嵩岳三呼之祝。徒罄微衷。

太皇太后牋

慈尊無上。方歌眉壽之隆。慶系有傳。及見耳孫之育。古今創觀。中外均歡。中賀恭惟尊號太皇太后殿下。化始周南。德同坤厚。翊中興之運。母儀坐閱于三朝。濬長發之祥。帝統遙觀于五世。備壽富康寧之福。形覃訃岐嶷之歌。仰推毓夏之原。是啓生商之瑞。臣叨塵禁路。退奉祠庭。春而秋。秋而春。孰計後天之算。子又孫。孫又子。益延過厯之期。

皇太后牋

居壽慈之宮。仰尊祖后。歌震夙之雅。誕育曾孫。茲振古之未聞。亦本朝之初觀。中賀恭惟尊號皇太后殿下。德先恭儉。性本仁明。親見堯舜。禹之傳。共循一道。上有姜任。妣之聖。宜致百男。果慶中闈。遂生元子。惟天心之眷佑。成國勢之安彊。臣祇奉真祠。阻陪賀版。本支百世。方欣五世之同堂。壽考萬年。坐看卜年之過厯。

太上皇后牋

思齊文母。媿慈極以俱尊。於赫湯孫。由中闈而載育。仙源有自。聖統其昌。中賀恭惟尊號。太上皇后殿下。德茂塗山。禮隆渭涑。上皇與子。贊成脫屣之高。聖主奉親。倍喜含飴之樂。當漢觀命名之始。想唐宮臨澡之同。四方流聞。萬口交賀。臣嘗叨持橐。退獲奉祠。移壽康之班。莫預千官之末。衍雲來之慶。更綿百世之期。

皇后牋

位正柔坤。將行冊禮。祥開游震。首得天材。上承列聖之休。益修重闈之慶。中賀恭惟皇后殿下。世傳勳閥。德應帝姻。帶弓韜于祿前。允協燕祠之瑞。設桑弧于門左。果符熊夢之占。三宮喜嫡長之昌。萬乘啓元良之正。稽前朝而嘗見。在今日以增光。臣退處衡門。阻趨祕殿。壽如山。升如日。願廣歸美之章。衣之裳。弄之璋。更獻多男之祝。

賀重明節表 慶元二年

黃屋非心。坐撫重離之節。玉卮爲壽。適臨載震之辰。慶溢宮闈。歡均海宇。中賀恭惟尊號。太上皇帝陛下。仁心愛物。德澤在民。天下爲一家。既全揖遜之盛。域中有四大。獨冠古今之尊。明繼聖而帝業愈隆。子生孫而宗支自衍。咸啓華封之祝。想開漢殿之儀。臣恪奉外祠。遙瞻慈極。嵩呼萬歲。莫陪就日之班。花覆千官。猶預需雲之宴。

賀瑞慶節表

虹流電繞。式符長發之祥。地闢天開。方際中興之運。一人有慶。萬壽無疆。中賀。恭惟皇帝陛下。受命皇穹。紹休列聖。問之朝。問之野。莫知神化之方。作之君。作之師。獨得道原之大。惟此就盈之月。是爲載夙之辰。仰三宮燕吉之歡。衍億世延洪之祉。臣叨陪法從。得奉真祠。帝所遙瞻。敢作鈞天之夢。廷紳布列。想聞嵩岳之呼。

賀奉上壽聖隆慈備福光佑太皇太后壽成惠慈皇太后聖安壽仁太上皇帝聖安壽仁太上皇后冊寶禮成。

皇帝表

尊處九重。莫先于孝治。慶綿四世。俱上夫隆名。誠振古之未聞。喜當今之獨盛。中賀。竊以加光佑惠慈之號。既歸二后之尊。崇聖安壽仁之稱。仍謹雙親之奉。緝儀具設。綵仗交輝。天地爲之清明。宗社于焉鞏固。恭惟皇帝陛下。日行舜德。思廣文聲。謂治國必自齊家。惟篤近乃能舉遠。矧當旋乾轉坤之始。克躬問安。視膳之勤。迺因萬國之歡。用顯三宮之懿。臣屏居東甬。寓直西清。澤笏影纓。雖阻陪于鳳蹕。範金鏤玉。徒想望于龍樓。

太上皇帝表

備九重之色養。祇奉慈仁。得萬國之歡心。載揚顯號。皇儀具舉。孝治彌光。中賀。竊以聖聖相承。本朝爲盛。

安安克遜。三葉尤隆。惟壽居五福之先。惟仁在四端之首。尊無與二。固不可以易言。蕩無能名。要當舉其大者。恭惟尊號。太上皇帝陛下。躬帝堯之盛。篤仲尼之恭。廣大之配乾坤。宜享延洪之算。忠厚之及草木。益昌積累之休。仰睿聖之建期。極愛欽而盡道。親奉範金之寶。首披鏤玉之篇。兼衆美以特書。粲彌文而相接。凡居覆幬。罔不瞻依。臣頃侍詞垣。茲歸真館。飾琚瑀玳瑁之佩。莫陪天仗之朝。聞鐘鼓管籥之音。尙想龍樓之曉。

太皇太后牋

尊處東朝。坐見魯孫之孝治。禮嚴北闕。載加文母之鴻稱。大册告成。本朝增重。中賀。竊以壽先嚮用。具著箕疇。聖本思齊。是歌周雅。慈爲三寶之首。旣以益隆。福者百順之名。又皆兼備。茲仰鋪張之盛。彌光保佑之功。恭惟尊號。太皇太后殿下。德厚柔坤。道參太極。堯舜禹之相授。贊睿斷于宮中。姜任妣之俱賢。播徽音于宇內。隆興而後。四舉綉儀。紹熙之間。洊修盛事。矧親提于神器。付託得人。宜首上夫瑤編。祇承于帝。歡傳有截。燕及無疆。臣嘗玷從班。欣逢曠典。宮闈再闢。想聞天仗之來。賀版羣趨。莫預廷紳之後。

皇太后牋

鏤白玉之牒。上徽稱于慈尊。建翠華之旗。藏綉儀于聖代。歡傳宮壺。慶浹垓垌。中賀。恭惟尊號。皇太后殿下。德媿妣。藝聖齊任。妣再世揖遜。實參決于廟謨。三宮康寧。爰竝崇于色養。惟神孫之盡孝。仰祖后以承休。取仲尼五美之言。明老聃三寶之訓。用形容夫懿範。以昭著于彌文。臣退處海瀕。阻趨天闕。瞻壽慈之

新勝莫預班聯歌思齊之首章第勤頌禱

太上皇后牋

寶冊誕揚仰奉慈闈之懿徽稱備舉益增母道之光宗社愈隆華夷交賀中賀恭惟尊號太上皇后殿下聖齊任妣德媿皇英方綿四方之休親受九州之養王母之坐少廣壽固無期鸞虞之應召南仁不勝用仰嗣皇之盡孝極禮典以歸尊三殿交歡萬方同慶臣比叨荷蒙茲獲奉祠引振鷺之班莫陪進旅而退旅粲珣珉之牋更聽大書而特書

皇后牋

三殿祲容俱上鴻名之懿一人孝治端由內助之勤凡屬照臨舉深抃蹈中賀恭惟皇后殿下慶綿奕世位處內朝陰教所覃有卷耳樛木之美柔儀克謹奉長樂未央之尊聿嚴揄翟之衣同上珣珉之冊邦彝有耀家法愈新臣頃玷禁途茲安海嶼側聞曠典但知獸舞之歡遙望昕朝莫遂臯趨之願

賀皇后受冊


皇帝表

廷揚大冊克備于祲容位正中闈聿嚴于內治歡傳禁掖喜浹編民中賀竊以尊尊親親既極三宮之奉夫夫婦婦是爲萬世之基頒制綽于嗣服之初飾褱衣于歷年之後禮文惟稱地道有光恭惟皇帝陛下德本世修合由天作上未央之萬壽方陳漢殿之儀嗣太妣之徽音更篤周詩之慶卷耳之志當佐于君

子思齊之聖。以御于家邦。朝夕永致其憂勤。夙夜不忘于警戒。于焉正始。豈專爲恩。臣退奉眞祠。恭聞盛典。漢之廣江之永。遙觀美化之流行。渭之涘。洽之陽。咸慶舊章之復見。

皇后踐

陳儀楓陛。具昭丹冊之華。正位椒塗。光被禕揄之飾。事關宗社。歡動宮闈。中賀。恭惟皇后殿下。慶襲安陽。行高媯汭。起家而居爵位。蚤締天姻。好述而樂鼓鐘。益彰后德。密輔九重之孝治。仰承三后之徽音。盛典告成。內朝增耀。臣祝釐惟謹。竊粟自慚。迹雖滯于周南。化已行于漢域。禁林草制。曾蒙乙夜之觀。從橐趨班。阻預長秋之賀。



攻媿集卷十七

表牋

謝大中大夫表

一身去國。方叨祠廩。以娛家。四品頒綸。乃次年勞而增秩。素餐已甚。丹悃知歸。中謝。伏念臣少也數奇。晚而多幸。備皂衣之吏。三朝許廁于周行。聯紫臺之華。四載得陪于從列。踰涯自愧。補外以行。荷聖君從欲之仁。賦真館祝釐之粟。班通禁路。尚汗文謨。內閣之嚴。法應吏銓。遂躡秦官大夫之首。寄祿寢高于世。冑被恩得。奉于親歡。視賈誼之超遷。固非敢望。比申公之卽拜。豈不懷慙。茲蓋伏遇皇帝陛下。器使羣工。曲成萬物。念論思之舊侍。未忍遐遺。付品式于有司。許容平進。周章登受。俯偃何言。臣敢不祇服訓辭。欽承命數。老疾而無職事。實深稱于閒居。優游不易公卿。特未知于報所。

賀重明節表

慶元三年

少暉司秋。適屆肅霜之候。重明麗正。欣逢繞電之辰。慶浹三宮。歡騰四海。中賀。恭惟尊號。太上皇帝陛下。道隆邃古。澤潤生民。引養引恬。自得怡神之樂。無倫無敵。尤高與子之明。福如日以正中。年與天而同久。千秋紀節。固知黃屋之非心。萬歲爭呼。又見玉卮之爲壽。自他有耀。申錫無疆。臣嘗侍宸旒。茲游真館。恭

陳虎拜阻陪漢殿之儀。遙想龍樓。徒效華封之祝。

賀瑞慶節表

斗樞電繞。良月占載震之祥。崖石天齊。令名採中興之頌。四方來賀。百福具宜。中賀恭惟皇帝陛下。夙重聰明。躬行勤儉。奉三宮之色養。孝治日隆。得萬國之歡心。休祥雲委。當重熙而累洽。能持盈而守成。咸傾就日之誠。仰贊後天之算。臣頃陪鷺振。親覩龍飛。上萬年之觴。夢徒游于帝所。接千歲之統。心惟祝于皇齡。

慰壽聖太皇太后上仙

皇帝表

奉慈尊于四世。孝治方隆。傳遺誥于萬方。哀號何極。中慰恭以尊號。太皇太后。道高任。媿德邁。城。三朝居長樂之尊。九秋享無疆之壽。手提神器。親授曾孫。功成不居。仙去何速。恭惟皇帝陛下。躬承慈訓。圖報洪恩。北面祈朝。備四海九州之養。東朝晏起。懷千秋萬歲之悲。忍從五日之哀。特用周期之服。願少寬于聖抱。期益慰夫親慈。

太上皇帝表

太皇厭代。慈辰興哀。覆幬所臨。悲號何及。中慰恭以尊號。太皇太后。道妙千古。母儀四朝。決內禪之訏謨。功在社稷。受曾孫之色養。福等岡陵。乃以微疴。遽傳晏起。恭惟尊號。太上皇帝陛下。仰遵遺訓。祇服通喪。

願寬聖子之孝心。勉徇先王之中制。

皇太后牋

慈福上賓。悲纏率土。愛欽素著。哀動重闈。中慰。恭惟尊號。皇太后殿下。夙奉太任。親承大舜。婦聽而婉。實爲內壺之觀。喪致其哀。莫贖終天之痛。願遵禮制。少抑孝思。

太上皇后牋

壽聖升遐。慈尊永慕。恭承凶問。均極悲悼。中慰。恭惟尊號。太上皇后殿下。寅奉重闈。恪修陰教。方日勤于孝養。期仰嗣于徽音。胡不萬年。忽成千古。在人情而難處。冀聖念之少寬。

皇后牋

光佑訃聞。邇遐哀動。驟失慈尊之蔭。諒增悲慕之心。中慰。恭惟皇后殿下。四世承顏。累年逮事。雞鳴問寢。每勤禕翟之行。鶴馭登仙。遂有雲霄之隔。願推至理。少抑深衷。

謝再任宮觀表

僻居海嶠。推戴上恩。游畀祠官。忽頒嚴旨。慙無報國之所。喜便事親之私。中謝。伏念臣潦倒無堪。遭逢過分。奉身而去。徑歸綿上之田。畏影自憐。更臥漳濱之疾。當一喜一懼之交切。何三仕三已之敢云。幸遂投閒。庶幾養志。屬書再致。未免有言。旣徹九重。亟蒙從欲。闔門相賀。遂寬乞米之憂。連歲何功。徒致取禾之誚。茲蓋伏遇皇帝陛下。續旒無蔽。簪履不遺。求齊國之世臣。尙其餘幾。數正元之朝士。今亦無多。賜以斗

升濟其菽水。臣敢不仰銜隆施。退適餘生。願朝暮承顏。得效老萊之戲。雖漁樵混迹。敢忘魏闕之心。

賀重明節表

慶元四年

繼明而照四方。夙紀誕彌之節。得秋而成萬寶。是當載震之辰。慶溢霄垠。歡均海宇。中賀恭惟尊號。太上皇帝陛下。尊同太極。福浸黎元。由父作子。述之明。得內聖外王之道。脫履崇高之表。怡神夔護之中。鳳蹕來朝。當電繞虹流之日。龍樓上壽。皆山呼鼉抃之人。睿算無疆。洪圖有永。臣既收朝蹟。游處祠庭。與造物者遊。敢陳金鑑之錄。獻封人之祝。徒想玉卮之儀。

賀瑞慶節表

良月就盈。出應五百年之運。四方來賀。仰祝三萬歲之期。宮壺交歡。宗祊協慶。中賀恭惟皇帝陛下。行符乾健。德與日新。寅奉重闈。深思付託之重。游開二閣。用廣緝熙之明。益增孝治之隆。坐振儒風之盛。如雲如日。喜逢誕聖之辰。非霧非煙。茂鬱與王之瑞。敢伸虎拜。用贊堯齡。臣再奉真祠。僻居下國。表冠就列。莫陪嵩嶽之呼。泚筆歌功。願獻涪溪之頌。

謝落職罷宮觀表

杜門卻掃。幸家食之少安。褫職罷祠。忽臺評之下及。尚從寬典。祇荷隆恩。中謝伏念臣戇直有餘。頑冥自信。生逢昭代。屢玷周行。年除歲遷。實由于親擢。左提右挈。敢藉于先容。久居封駁之司。幾作怨仇之府。用過其分。思稱所蒙。始求補外。以牧人。已叨臨遣。旋請投閒。而奉母。又辱於從。五年自放于江湖。一飯不忘。

于君父獲棲故隱。可謂幸民。然猶通內閣之清班。竊殊庭之厚祿。餘生何有。惟斷斷以無他。公論弗容。尙斷斷而不可。煩言果至。百譎奚逃。仰聖度之恢洪。閱危蹤之孤露。爰施薄罰。以示小懲。茲蓋伏遇皇帝陛下。仁務包荒。爵惟馭貴。衛纓雖許。終不可以假人。漢印旣銷。適足明于無我。俯憐簪履之舊。猶齒搢紳之間。臣敢不屏息訟愆。投誠戴德。循南陔而戒養。退甘三釜之貧。望北闕以傾心。莫效一毫之報。

謝宮觀表

杜門窮巷。將沒世以訟愆。賦粟珍臺。僅踰時而復舊。開孤迹自新之路。承大君莫報之恩。得之若驚。感而至泣。中謝伏念臣頃承鸞綴。親覩龍飛。詞禁代言。首播絲綸之命。經帷進讀。不違咫尺之顏。一去闕庭。四叨祠祿。初出懇祈之切。兩蒙簡記之私。惟此僥逾。尤爲優異。雷霆所擊。寧忘失箸之憂。日月有明。忽照覆盆之下。豈無望于歲年之後。不謂得于旬朔之間。顧鵠職之告未頒。而祝釐之廩已繼。人謂去珠之再得。自憐墮甑之猶全。頓增菽水之歡。足慰桑榆之晚。茲蓋伏遇皇帝陛下。仁無棄物。道本用中。芝柱呈祥。方炳靈于太室。玉卮爲壽。喜親慶于慈闈。廣四海以推恩。軫一夫之失所。有如閒廢。亦荷矜存。臣敢不仰體隆知。益安愚分。半九十里。深嗟末路之難。取三百困。徒切素餐之愧。

謝進封開國子加食邑表

職在琳宮。方謹祝釐之奉。詔分穀璧。更蒙與邑之多。敢期洪私。下及散地。中謝伏念臣頃叨推擇。濫預論思。自登瑣闥之聯。已經采食之賜。明時未棄。歸猶得于祠官。比歲以前。居幸霑于郊霈。賤息旣承于延賞。

先臣復被于追榮。獨此加恩。格而不下。方斯念咎。噤弗敢言。顧三百戶之逋。罔知所自。念五十里之小。相去幾何。迨茲祭澤之頒。始冒綸言之寵。母升次郡。爵進小邦。再拜知歸。一門增耀。茲蓋伏遇皇帝陛下。禮嚴宗祀。惠及臣工。仁不忍于遐遺。福靡求于專嚮。遂令遠外。亦荷寵光。臣敢不俯媿素餐。著銘丹悃。奉璋就列。莫輸奔走之勞。分土疏封。安有藩宣之力。

謝通議大夫表

祠館無庸。猶會八年之課。宸綸甚渥。俾居四品之官。拜命增榮。撫躬知懼。中謝伏念臣才非適用。仕止爲貧。幸逢揖遜之朝。寔冒論思之列。久司封駁。徒積悔尤。親覩龍飛。實專內外之制。旋升鸞綴。更兼文武之銓。爰揣分之易盈。以治民而自詭。母旣登于大耋。身亦覺于倦游。力請投閒。仰蒙從欲。江湖麤足。久甘漁者之爭隈。簪履弗遺。深媿廩人之繼粟。方奪榮之是懼。何增秩之敢言。漢詔聿頒。尙得從大夫之後。隋官平進。猶使陪廷議之餘。茲蓋伏遇皇帝陛下。圖大宅中。謹徵接下。幽明攷績。一付有司之公。日月爲功。俯及從臣之舊。有如衰廢。亦玷褻遷。臣敢不仰佩鴻私。愈堅晚節。與之三釜。方承戲綵之歡。加以數年。祈遂懸車之願。

謝再任宮觀表

孤蹤去國。六換歲華。明命臨門。五叨祠廩。積素餐而自媿。拜黃牒以知歸。中謝伏念臣處世最疎。逢時多幸。把麾江海。因得遂于歸耕。聽履星辰。今殆成于昨夢。賤齒已開于七秩。親年旣越于九齡。無由陳力于

清朝祇合投閒于故里。先疇至薄。歡微祿之未忘。吏攷將更。驚俞音之游及。豈止寬憂煎于數口。又將竊溫飽于二年。有何勞能。蒙此撫養。茲蓋伏遇皇帝陛下。躬操八柄。坐制萬方。念筆橐之舊臣。雖無可錄。軫蓋帷之至意。尙爾不遺。使仍香火之緣。以遂山林之適。臣敢不祇承恩渥。涵泳化風。菽水有餘。得效萊衣之戲。雲霄在望。惟存魏闕之心。

謝復職表

四年負譴。尙玷從臣之階。一札疏恩。復還學士之直。周章拜賜。感激爲榮。中謝伏念臣愚不知方。志徒泥古。頃更郡寄。嘗辱賜環。屢玷朝行。寢叨持橐。代言批敕。曾何有于論思。約史侍經。每自慙于玩愒。典銓未幾。懷綬以歸。尋力請于真祠。仍寓班于內閣。致煩言之俯及。甘暮景之宜休。敢意矜存。曲加拔拭。特寬漢律。申畀文謨。深憐爲養之勲。又予祝釐之祿。從天而下。撫己尤驚。茲蓋伏遇皇帝陛下。大度兼容。至仁善貸。謂臣親逢初政。曾廁衆賢之後。陳察臣自訟宿愆。不忍一眚而終棄。爰軫蓋帷之念。未忘簪履之遺。臣敢不祇戴寵光。日思報稱。奉百歲之母。益增萊子之歡。誦萬年之詩。願效封人之祝。

賀瑞慶節表

嘉泰三年

踐阼十年。益啓昇平之運。逢辰千載。又更震夙之期。兆姓交歡。一心同戴。中賀恭惟皇帝陛下。儲神淵靜。流化儉慈。仰列聖之好生。守爲家法。視四方而兼愛。務得民心。坐凝稽古之勲。增衍後天之算。臣屏居海嶠。遙睇宸廷。見黃河千里。一曲之清。第勤善頌。效嵩嶽萬歲。三呼之祝。莫預周行。

謝再任宮觀表

一收朝蹟。分老瀛壖。六畀祠宮。誠知帝寵。顧胡顏而亟拜。徒空食以懷慙。中謝。伏念臣晚幸儉安。近尤多病。四支而三痛楚。幾遂作于廢人。十日而九呻吟。惟退量于薄命。第以慈親之待養。曾無他計。以謀生。尙存未盡之年。更望無功之祿。仰干洪造。方局地以靡遑。敢謂隆寬。俄自天而賜允。里閭改觀。耄穉交歡。共瞻新渥之光榮。又獲全家之飽煖。卽衡門而被寵。望宸極以銜恩。茲蓋伏遇皇帝陛下。大度海涵。至仁天覆。俯憐簪履之舊。未忍遐遺。又與升斗之餘。使能蠶給。豈止一人之受惠。實令羣下之歸心。臣敢不強整衰殘。愈思感勵。奉琳宮之香火。每自處于幸民。掛神武之衣冠。冀終全于晚節。

謝落職表

孤臣失察。盡寘大呵。上聖隆寬。止從薄責。俄自天而有命。幾無地以容身。中謝。伏念臣生則多艱。仕皆過分。幸遇千齡之會。寢叨八座之聯。歸奉祠庭。猶寓西清之直。坐糜廩粟。不勞南畝之耕。頃蒙乘障之除。庸示起家之寵。方循牆而引避。痛陟屺以纏悲。顧平時藏拙之最深。矧游歲執喪而致毀。猥緣親黨。非意相干。不善防閑。自貽伊戚。仰公朝之矜恕。念舊物之顛連。褫學士之班。再斯可矣。使臣工之肅。其在茲乎。迨釋服以及期。敢陳詞而謝罪。茲蓋伏遇皇帝陛下。冕旒無蔽。簪履不遺。以天地之心爲心。何止國君含垢之意。謂兄弟之子猶子。真得聖人觀過之仁。遂于危蹤。止用輕典。臣敢不闔門念咎。望闕歸恩。三黜何言。但有動心忍性之戒。餘生無幾。徐上引經告老之章。

謝龍圖閣直學士致仕表

致大夫之仕。仰賴矜從。進學士之班。弗容避免。念餘齡之無幾。幸晚節之苟全。量小已盈。感深至泣。中謝
伏念臣學徒泥古。才匪適時。三列皂衣。寢叨嚴近。久塵青瑣。遂積怨仇。敢自詭以治民。爲專求于奉母。侵
尋一紀。孤苦再期。耄矣無能。每媿祝釐之廩。仕焉而已。況逢告老之期。游貢封章。遠投君父。喜下情之上
達。荷人欲以天從。誥頒東海之濱。職峻西清之直。鹿車還里。難忘貧賤之時。龍馬負圖。乃昇衰殘之候。何
夢寐之敢及。亦家世之所無。茲非幸歟。不翅足矣。茲蓋伏遇皇帝陛下。德新惟日。仁覆如天。俯眷么微。忝
螭陛隨班之舊。更憐散骸。當龍飛草詔之初。尙問生全。不忍遐棄。聿頒茂渥。式資窮途。臣敢不內誓丹心。
益堅素節。退人以禮。已增鏤骨之私。教子以忠。使效捐軀之報。

謝落致仕除翰林學士表

代庖僂直。又見卯年之周。視草爲眞。復塵乙夜之覽。撫危蹤而何幸。尋故步以知慙。中謝竊以詞禁遽嚴。
宸居密邇。有直諒多聞之益。乃可預于論思。爲溫厚爾雅之文。始宜司于播告。鼓風雷之大號。增日月之
末光。匪得英髦。曷勝遴選。伏念臣學惟涉獵。才乏菁華。頃載筆于螭坳。尋演綸于鳳閣。以先朝之門客。爲
天子之私人。方成王訪落之初。預聞國論。逮漢家更化之始。首被召音。惟投閒一紀之餘。且告老三時之
久。茲以晚節衰殘之迹。參內朝供奉之班。念齊國之世臣。所存無幾。歎元和之學士。不謂重來。茲蓋伏遇
皇帝陛下。思任舊人。聿修庶政。朝綱日振。急聞忠盡之言。疆事未寧。尤務坦明之制。遂令庸陋。亦玷招延。

臣敢不修葺蕪詞。仰裨藻飾。尚祈聖度。俯矜草芥之微。終俾凋年。遂逐桑榆之晚。

謝吏部尚書兼翰林學士侍讀修史表

比蒙召節。趣歸紫橐之班。疊被恩綸。盡復青氈之物。德有乾坤之重。身同淵谷之危。中謝竊以才不可以強爲。人當知于自度。非山濤之識量。豈足典銓。必陸贄之文章。始堪視草。露門贊緝熙之益。虎觀資潤色之工。曾未能其一焉。奚可兼夫四者。伏念臣既衰無用。已試罔功。屏居一紀之餘。且經告老。入對九重之下。恍若更生。而乃冒選部之真除。尋禁林之故步。進讀清閒之燕。充員筆削之間。敢言眼赤之何時。深媿汗青之無日。身章愈煥。轡飾增華。儒生之爲詞臣。誤辱公朝之寵。天子以賜學士。尤加暮景之榮。茲蓋伏遇皇帝陛下。政務惟新。人先求舊。取之數路。宜廣擇于時髦。備于一夫。恐徒妨夫捷徑。凌兢拜命。頽墮知慙。臣敢不勉策庸愚。仰酬眷獎。掌選而分文武。詎敢辭勞。垂車以示子孫。終期得謝。

辭免簽書樞密院事表

誤恩下逮。俾綴邇聯。遜牘上陳。未頒俞旨。仰冒蓋高之聽。不嫌再瀆之煩。中謝恭惟累朝。特重右府。豈獨爲三軍五兵之本。抑使聞一日萬幾之微。才則甚難。官何必備。顧愚臣之無取。荷上聖之深知。起之掛冠閒廢之餘。處以持橐清華之舊。強顏寢久。告老未諧。尚不堪朝夕之論思。何以裨夙夜之宥密。進寓承明之直。更列元良之賓。揣己奚堪。逾涯莫甚。欲望皇帝陛下。俯垂淵鑒。洞察忱衷。念已迫于桑榆。盍居閒地。儻未遺于簪履。姑置從班。別求經濟之材。以翌昇平之運。

謝簽書樞密院事表

銓部爲眞。猶未經于滿歲。機廷籓式。乃遽辱于頒恩。遞避靡遑。周章增惕。中謝竊以官莫崇于執政。職尤重于本兵。必求文武之全才。以任國家之重事。邊圉甫定。尙勤宵旰之憂。邦域以寧。允藉弼諧之助。豈應疲瘁。可預幾微。如臣者資實腐儒。仕叨法從。由久司子封駁。故多積于怨仇。十載歸閒。仰戴乾坤之施。一朝收召。復觀日月之明。不堪聽履之華。伏上垂車之請。敢期誤渥。俾贊洪樞。血氣旣衰。止合奉身而去。軍旅未學。曷知基命之嚴。玷書殿之清班。忝儲局之下客。被繡韉于上駟。束繆帶于襲衣。采食有加。寵榮已甚。茲蓋伏遇皇帝陛下。人惟求舊。政務圖新。謂代言于受禪之初。未忘孤迹。迨趣還于更化之始。深鑒凋年。豈云術業之可稱。蓋自眷私之過厚。遂容僥倖。倍切凌兢。臣敢不深感隆恩。愈堅晚節。老當益壯。固欲殫報主之忠。毫矣無能。終恐負知人之哲。

謝皇太子牋

謬參樞筭。仍污紫殿之班。兼預儲賓。始下青宮之拜。以榮爲懼。得寵若驚。中謝伏念某少也無奇。晚將焉用。掛冠而去。眞成治世之幸民。扶杖以觀。親覩聖君之更化。首祗嚴召。重覲清光。俾視草于鑾坡。旋典銓于選部。露門進讀。冊府紉書。舊物復還。空積妨賢之愧。故山在望。但祈得謝而歸。敢冀明綸。擢登右府。致此血氣旣衰之迹。廁于衣冠甚偉之中。揣己奚堪。荷恩有自。茲蓋伏遇皇太子殿下。性鍾玉粹。學振金聲。子職日供。肅侍凝旒之側。官僚妙選。誤收華髮之餘。某敢不益勵駑才。用酬鴻造。退憐已老。莫能陪宥密。

之司。勉誦所聞。庶或補溫文之德。

辭免同知樞密院事表

宥府選寮。忽叨再命。需章避寵。尙闕一俞。爰游瀆于宸聰。冀終回于渙渥。中謝。伏念臣引經納祿。奉詔還朝。始膺典選之除。適預和戎之議。既不能出奇策以強國勢。又不敢抗高論以竊時名。深惟世務之宜。遂定從官之論。鄰盟已講。邊備粗寬。魏絳何功。姑欲就威懷之得利。張昭雖老。當使知將相之有人。賴聖慈俯徇于和親。在臣下盍爲之引咎。自媿寡謀之甚。難陪基命之司。殆無地以寄顏。惟竭誠而報主。日圖內治之要。未知所先。靡厭衆言之求。尙不暇給。有何勞效。遽被推遷。不勝據蒞之憂。徒謹循牆之走。伏望皇帝陛下。俯垂淵鑒。洞察愚衷。豈惟微臣。懷以榮爲懼之恐。仰祈睿算。篤居安慮危之心。精求文武之才。用贊樞機之任。

謝同知樞密院事表

鑿宥密之班。未知圖報。拜便蕃之渥。弗許終辭。自揆僥逾。實深感惕。中謝。竊以皇家嚴二府之建。任固匪輕。機庭分四等之差。官毋求備。賢相並兼于使領。副樞足贊于事幾。既曰才難。豈容序進。伏念臣少無可用。老尙何堪。扶病以對便朝。幸不違于咫尺。強顏而居舊著。顧奚補于毫分。假寵已多。句閒未得。敢謂七旬之後。冒參兩地之榮。昇與國熙載之官。已爲過分。加淳化寇準之職。尤媿無名。偶緣廷告之同時。因與政途而接踵。在法當從。既超筆橐之聯。計日而言。僅周天地之數。併增采食。游被匪頒。茲蓋伏遇皇帝陛

下懋建大中。丕乘輿運。謂股肱所寄。方彙進于時髦。雖筋力既衰。亦使陪于末議。未遑席暖。復俾階升。臣敢不仰戴隆私。益堅素守。邊陲甫定。願裨內治之謀。里社相望。期遂歸休之請。

辭免參知政事表

進參政柄。誠出誤恩。冒貢遜函。未回淵聽。洊布懇祈之切。敢辭俯偃之恭。中謝伏念臣才不逮中。身今既老。十載排根之已甚。實倍費于保全。一朝收召而復還。又屢叨于褒擢。非敢忘知止之義。蓋欲堅圖報之心。今則疾疢交侵。徒強顏而自覲。年齡云邁。顧納祿之未能。使在旬月之間。稍有毫釐之補。序遷而上。己分已逾。而況據案牘而書名。雖具員而何益。對冕旒而奏事。無長策之可陳。誤寵所加。羣言必駭。欲望皇帝陛下。念經綸之事重。思輔贊之才難。別選英髦。俾作調元之助。毋容衰瘁。更貽濫吹之譏。或畀舊班。俯存孤迹。

謝參知政事表

充貳樞庭。方慙玩愒。晉陪宰路。遽被推遷。倍深臨谷之危。莫遂循牆之請。中謝竊以朝廷建輔。號天子之四鄰。政事參聞。下丞相之一等。定名稱于乾德。復官制于建炎。必求異能。乃副隆委。伏念臣頽齡景迫。壯志日彫。再掌吏銓。但守停年之格。濫居宥府。未寬思職之憂。雖粗竭于譴才。終莫裨于末議。負二宜去。有七弗堪。宿恙漸侵。將籲天而致禱。誤恩狎至。真踏地以靡遑。況秉鈞當軸之虛員。而知印押班之分日。兼與漢章之約。仍從商皓之游。命服匪頒。復賜天間之駿。爰田增衍。更開公社之封。昔在本兵。尙爲僥冒。茲

叨助理。尤懼曠療。茲蓋伏遇皇帝陛下。盛德又新。至誠樂與。折衝禦侮。坐底于外。寧聚精會神。力先于內。治揀求俊乂。置任弼諧。聿令衰退之蹤。亦忝延登之數。臣敢不益殫愚慮。仰贊宏規。曰都曰兪。願竊慕廣歌之喜。知足知止。庶幾從告老之私。

攻媿集卷十八

表牋

代宰臣謝宣示太上皇御書宋玉高唐賦傅毅舞賦陸機文賦嵇康琴賦曹植洛神賦王粲登樓賦
史節故事段陳羽古意詩蘇軾養生論周興嗣千字文御跋表

乾道辛卯春。被賜眞行草書總十卷。臣下拜瞻玩。心目開明。竊惟書法。自東漢迄于晉。唐代有名
家。然莫不祖述鍾張。憲章羲獻。而各得一偏。未有超軼。拔乎其萃者。恭惟光堯壽聖。憲天體道。太
上皇帝。高蹈羲皇之上。遊戲翰墨之間。初若無意。而筆力所到。自得之妙。集乎大成。如春雲行空。
千狀萬態。遠視前古。有不足述。固知天縱之能。心與神會。非衆庶曲學之所可致也。帝王餘事。猶
能至此。顧不休哉。三月二日。臣某恭題。

奎畫昭回來。從慈極。睿思優渥。宣示邇聯。是何不世之逢。獲快爭先之觀。中謝竊以翰墨有法。肇自東都。
帝王好書。無如貞觀。雖具龍蟠鳳翥之體。徒爲心摹手追之勤。若夫天縱之能。拔乎其萃。自得之妙。集此
大成。聿觀歷代以還。未有今日之懿。恭惟尊號太上皇帝陛下。宸衷淵靜。帝學融明。一札細書。居多方國
之賜。六經大訓。式畀膠庠之傳。旣全脫屣之高。益有怡神之樂。坐進此道。作新斯文。取楚客之賦篇。迨梁

臣之韻語。舒牋自適。肆筆而成。乃因五日之朝。併演十編之富。恭惟皇帝陛下。茂隆孝治。仰識聖心。金口發明。究羣書之蘊奧。雲章交換。掩二典之光華。是雖餘事之能然。誠非曲學之所及。中祕將嚴于尊閣。外廷咸預于榮觀。臣夙際休期。幸瞻鴻藻。登牀競取。何敢效昔人之豪。鏤玉匪頒。尙幾爲私室之寶。

代宰臣進吏部七司法表

朝建天官。實總吏銓之要。詔刊治典。恭承聖作之規。會衆目以畢張。集前編之未備。幸終載筆。敢後奏篇。
中謝 臣竊以皇家陸累洽之期。選部有一成之法。屬中興之始。爰盡纂于舊章。迨更化以來。嘗再參于中制。惟奇請它比。隨日以滋。而巧吏猾徒。緣姦而奮。迺哀四紀之沿革。修爲一代之經常。然而漢定章程。止由柱史。唐更律令。亦任柄臣。未有上軫淵衷。俯垂明聽。凡曰甲令之著。首塵乙夜之觀。親灑宸毫。具標汗簡。必使繹尋而盡善。更容開釋其所然。既咨可錄之言。時出非常之斷。合吏封勳考之目。貫敕令格式之文。以至黜賊罪之賞延。進軍功于流內。恩防寬縱。例絕扳援。莫非近古而便今。務在舉宏而撮要。筆則筆削。則削。罔有差訛。官言官。朝言朝。此爲依據。恭惟皇帝陛下。治先自內。名不假人。澄三省之源。已嚴道揆。定七司之制。更肅班僚。立通用以去煩文。申權宜以存故典。警捕有酬獎之等。陞改易參照之科。使官人。之方。得以兼明。于覈實之次。誠非小補。臣等粗殫末技。莫望清光。事做石渠。稱制仰勳于臨決。才非山甫。有司終媿于將明。尙冀頒行。庶憑遵用。

代宰臣進仁宗皇帝今上皇帝玉牒表

神文出治。光紹三朝。睿主膺期。系隆列聖。鬯皇猷而潤色。寫翠琰以齊輝。中謝。恭惟皇帝陛下。政用時中。言爲世則。繼志述事。親承太上之心傳。遵制揚功。盡循我宋之家法。睿仁皇之盛際。延今日之宏規。惟天聖之元。實基四十二年之治。惟乾德之懿。將繼五三六經之隆。爰命儒臣。並修史牒。登載斯謹。會萃不遺。稽故事以成編。肅昕朝而進御。忠厚之及草木。知積累之自來。廣大之配乾坤。豈繪畫之能見。牙籤初秩。金匱祕藏。臣獲遇休明。居慙典領。祖功如在。期載續于無疆。帝業方崇。當特書而不一。

代皇子鄧王辭免册立皇太子表

丹悃冒陳。祈免升儲之命。皇恩加厚。未頒賜允之書。仰叩九重。敢伸再瀆。中謝。臣聞元良以正萬國。記言世子之能。繼明而照四方。易謹大人之象。以奉粢盛之祀。以繫億兆之心。苟素望之無聞。豈盛儀之敢受。伏念臣性難語上。學不知方。仰承君父之規。久親師傅之誨。奉長安日邊之對。蚤乏奇辭。辨陳留牘上之書。素無英識。戴乾坤之大造。升爵位之崇班。安知懷德之維城。但媿無功而受祿。綸言忽播。綺殿爰開。實懷不稱之慙。難冒非常之寵。伏望皇帝陛下。特回聖意。俯聽忱辭。不嫌渙汗之收。姑寢震宮之建。誓虔子職。少答睿慈。

又代謝册立表

睿旨中頒。誕開宮邸。微躬內媿。亟上封章。恩深弗遂于循牆。懼甚有同于臨谷。中謝。臣聞仰觀乾象。前星密邇于帝星。俯察坤維。少海實源于大海。歷稽盛古。必建元良。自非有賢聖仁孝之聞。備恭敬溫文之懿。

何以貳體宸極。正位少陽。伏念臣學識無長。器資非敏。實託本支之盛。屢叨爵位之崇。日就月將。幼已甄于慈訓。夏絃春誦。今未底于多聞。自媿屏庸。居懷兢懼。忽拜玉音之寵。冒陞銅輦之榮。入侍皇居。仰承天序。茲蓋伏遇皇帝陛下。仁周溥率。明照幾微。膺列聖之丕圖。奉上皇之色養。眷求主鬯。以重承祚。儲德未充。曷副人神之望。睿謨素定。不由羽翼之成。臣敢不益念前修。永遵雅誥。謹文王安否之問。敢怠帥行。書唐宗仁孝之詩。仰祈札賜。

又代謝太上皇帝表

從五日之朝。夙荷抱孫之愛。拜十行之札。俄膺立貳之求。仰慈訓之曲臨。懼微躬之匪稱。中謝臣竊以大人有繼明之義。蓋取諸離。長子爲主器之親。故受之震。豫建儲嗣。雖本前規。獲奉重親。未如今日。伏念臣幸以弱植。出逢聖時。列亞保之崇班。初非功致。胙真王之尊爵。深愧名浮。徒以託體嚴宸。承休慈極。忽頒丹詔。叨處青宮。共知睿斷之不回。實本聖謨之不顯。茲蓋伏遇尊號太上皇帝陛下。德高堯舜。道合羲黃。雖與造物者遊。自求至樂。仍有孫謀之燕。以永無疆。爰舉曠儀。以安神器。臣敢不力修四學。祇奉兩宮。立愛自親。仰體承祚之重。聿修厥德。敢忘念祖之勤。

又代謝皇后牋

坤德無疆。實依厚載。震宮肇建。遽及凡材。中謝伏念臣託質天支。承華壺則。干戈羽籥。教雖備于四時。父子君臣。學不臻于三善。忽奉褒揚之冊。俾當監撫之權。仰宸斷之剛明。賴母儀之裨助。茲蓋恭遇皇后殿

下德齊任。如賢過嫉。藝陰教肆。修坐致人倫之正。淑謀經遠。更圖國本之安。臣敢不居近正人。力尋舊學。祇召而不犯馳道。當奉君尊。問安而必至寢門。益虔子職。

又代謝受册表

銅門肇啓。方慙主鬯之良。珉册誕頒。更舉臨軒之禮。恩隆天地。懼劇淵冰。中謝伏念臣素乏材猷。積叨寵數。金印整綬。蚤處于宗藩。青蓋斑輪。俄升于儲位。復差良日。爰御正衙。備金石以盈庭。儼纓縷而就列。授之寶牒。訓以綸言。退省其私。不知所稱。茲蓋恭遇皇帝陛下。道高世表。機照物先。斷自宸衷。豈私于愛子。歲茲曠典。蓋重于承祧。臣敢不仰體聖謨。恪供子職。出有師。入有保。起居惟近于正人。親則父。尊則君。夙夜益勤于順事。

代宰臣賀立皇太子表

冢嗣稱賢。夙仰吾君之子。儲闈定禮。果安天下之心。歡動兩宮。慶均四海。中賀恭以離著麗天之象。繼明實繫于大人。震有洊雷之文。主器必歸于長子。闢東朝之緝禮。綿列聖之丕基。曠古難逢。于今創見。恭惟皇帝陛下。孝如虞舜。樂似文王。爰奉親嚴。屢上玉卮之壽。大寧國本。首開銀榜之宮。慶幼海之澄瀾。瞻前星之騰耀。一人獨斷。非由羽翼之成。三善自將。克荷宗祧之守。臣叨居近列。恭覩盛儀。日下重光。已備夙成之德。嵩呼萬歲。敢忘歸美之誠。

代宰臣賀太上皇帝表

神謨早定。俾建元儲。聖孝丕承。誕揚宸制。事關宗社。喜動華夷。中賀。恭以甲觀之生嫡玉孫。但有命名之愛。一日而見三天子。止聞臨澡之歡。載在信書。以爲美事。曾未有傳神器而與子。見東宮之立孫。介蒞祿于無疆。固蘿圖而有永。恭惟尊號。太上皇帝陛下。道高百聖。仁覆萬方。翼燕孫謀。獨享後天之算。儲登世嫡。共仰前星之輝。問安獲事于重親。主器仍歸于長子。臣欣逢盛際。獲在邇聯。卜世卜年。期過周家之曆。重輪重潤。願廣漢樂之詩。

代宰臣賀皇太子牋

儲德日新。久繫于衆望。睿謨獨斷。爰舉于曠儀。覆載兩間。懽呼四起。中賀。恭惟皇太子殿下。地居冢嫡。天與奇姿。震一索而得長男。宜膺主鬯之寄。漢元年而建太子。益知享國之長。仰九廟之儲休。信兩宮之增慶。人心自定。神器愈安。某等肅領鵷行。進瞻雞戟。元良既正。不煩賈誼之言。盛美難名。莫盡卞蘭之述。

代謝吏部侍郎表

以下四首。代魏丞相。

代言西掖。方拜誤恩。攝貳東銓。復叨改命。循牆莫避。臨谷增危。中謝。伏念臣蕩落無堪。迂愚自信。正以經營于菽水。故嘗希望于斗升。昨自外官。恭趨嚴召。猥廁內朝之鵷列。親覩上聖之龍飛。五歷粉闈。一參月寺。籌邊戎幕。無婉畫之可稱。將命蒞庭。幸歡盟之復締。冒柱史詞臣之選。兼宮端寶牒之司。初無左右之先容。盡出聖神之親擢。忽承帝制。俾倅天官。一新龜紫之榮。仍假銓衡之長。莫回成渙。徒激懦衷。茲蓋恭遇皇帝陛下。虛以受人。明于分職。憐臣孤立。于宦路。借以末光。謂臣曾歷于劇曹。付之重委。臣敢不寅遵。

邦憲嚴制吏姦。朝夕論思。雖素乏嚴。吾之譽簿。書期會。庶勉追裴馬之名。

代謝侍講表

攝居選部。已困劇曹。擢在經幃。更承清問。退慙衰朽。有此遭逢。中謝伏念臣幼歷羈艱。學無師法。顧孤陋寡聞之習。但爲決科之資。無疏通知遠之經。素匪專門之業。矧是帝王之大學。非爲章句之小儒。必求鴻博之人。以究淵源之蘊。豈容樸學。獲奉細旃。茲蓋恭遇皇帝陛下。巍巍成功。謙謙終吉。時降至尊之勢。兼收可錄之言。遂容草莽之臣。亦預金華之講。臣敢不黽勉微力。綴緝舊聞。爲二三萬言之辭。敢求釋義。暢五十八篇之旨。庶補重明。

代辭免進國史轉官表

約史何功。敢叨醲賞。騰章避寵。未拜兪音。游貢誠衷。仰于睿聽。中謝竊以三朝之治迹。允爲萬世之成規。信傳信疑傳疑。已備不刊之典。筆則筆削則削。屢資多學之儒。而臣方貳政之未幾。適成書之已久。暫領纂修之職。曾無潤色之勞。使冒賞而不疑。則叨榮之太甚。而況近辭珍賜。陛下固已許其廉。茲躡崇資。公議必傳以爲笑。謂少者辭而多者則受。謂今日是則前日爲非。雖故事之有初。在微臣而焉敢。伏望皇帝陛下。俯矜賤悃。特寢異恩。益使人心。知清朝以名器爲重。誓殫愚慮。効薄伎于志傳之間。

代遺表

生而致主。曾亮采之無聞。死不忘君。豈效忠之可已。危悚欲吐。老淚先傾。中謝伏念臣奮自羈單。本無僥

覲蚤廁熙朝之鷄序。親逢上聖之龍飛。猥以譴材。屢叨隆委。凡一時清切之選。皆九重特達之知。兵交而使其間。備更險阻。猷告而爾順于外。嘗預論思。寢歷政塗。遂登揆席。迄緣樸拙。用速顛隳。俯憐簪履之遺。旋畀屏藩之寄。人言噂沓。何敢控陳。天鑒高明。卒蒙昭雪。賦以真祠之祿。予之祕殿之名。屏跡衡門。銜大恩而莫報。馳心魏闕。顧一飽以何安。今則蒲柳益衰。桑榆既逼。老將智而耄及。福已過而災生。臥疾漳濱。恍精神之易散。游魂岱嶽。嗟頃刻之難留。僅存餘息之微。重結明時之戀。伏望皇帝陛下。治功惟敘。聖德又新。總萬幾之要。以充毓天和。合羣賢之智。以維持國是。問安慈極。日承尊養之歡。注想中原。身濟規恢之業。臣命隨氣索。志與辭殫。王度清夷。固無煩于尸諫。死期迫促。徒自切于哀鳴。

代知泉州謝進職再任表

以下四首。代舅氏汪尙書大猷。

承南服之流。忽叨因任。進西清之秩。併辱東知。拜寵命以增榮。俯懦躬而有覲。中謝。伏念臣奮自寒遠。遭世休明。分甘州縣之塵勞。敢望朝廷之拔擢。十年服采。寢登侍從之班。千載逢辰。曲被聖神之眷。此雖攝六官之長。猶未爲貳卿之真。及遂求閒。遽超次對。退惟愚孱。已劇優隆。起試外藩。以治民而自詭。游更下攷。無報政之可書。方將重上真祠之章。豈意更升學士之列。一變閩俗。初無常袞之稱。更與泉塵。仍繼蘇襄之後。已試如此。其可再乎。無功而遷。誠爲過矣。茲蓋伏遇皇帝陛下。政先實核。恩不遐遺。念微臣非可用之才。羸堪郡寄。謂長吏多數易之弊。就畀璽書。復增延閣之華。益重專城之任。臣敢不勉其未至。究所嘗行。久悉邦風。既無勞于問俗。務攻吏事。庶不負于分憂。

代謝隆興府到任表

上印泉南方。遂祠庭之請。把麾江右。遽叨帥閫之除。猥荷東知。若爲稱塞。中謝伏念臣幸逢昌運。忝綴從班。昨辭遠于脩門。効蕃宣于遐服。目駐堯天之日月。身留閩徼之山川。未及終更。已叨因任。共知鼯鼠不堪五技之窮。自分鷓鴣。惟望一枝之足。屢申誠悃。仰扣淵聰。卒蒙從欲之仁。獲遂投閒之志。千里未還于榆社。十連復冒于綸音。旋促對於清光。誤親承于睿獎。授之方略。俾以奉行。茲延見于吏民。方究詢夫風俗。惟南昌之名郡。實上聖之潛藩。襟帶江湖。首尾吳楚。雨暘方若。正賴春耕秋斂之勤。凋瘵已蘇。猶藉左粥右餐之惠。必得循良之吏。庶安流宄之民。豈應慙愚。堪此委寄。茲蓋伏遇皇帝陛下。恢張治具。駕御人材。察臣久被使令。既深知于德意。念臣備嘗險阻。亦粗識于民情。特畀虎符。俾殫駑力。臣敢不布宜寬大。禁戢姦欺。當使田間盡改帶刀之習。且令州縣毋存珥筆之風。

代賀太上皇帝上尊號表

啓龍樓七十之慶。春朝將展于上儀。率鷄列三千之臣。至朔先加夫嫩稱。事高治古。權溢綿區。中賀竊以薦舜于天。堯帝聰明而遜位。以武爲子。文王逸樂以延年。不有極尊之稱。曷爲甚盛之舉。鏤白玉之牒。歸美兩宮。建翠華之旗。親朝五日。書契未有。宗社無疆。恭惟皇帝陛下。道盡事親。仁先自內。謂富壽之福。爲彝倫之所先。而父母之年。在常人而猶喜。況承社稷之託。親見春秋之高。自非得九州四海之懽心。備五帝三王之全美。何以效之慈極。副我淵衷。爰集廷紳。取于經而定大號。更推帝澤。斂時福以錫庶民。上皇

增萬壽之昌。太姒嗣徽音之懿。至矣盡矣。不可有加。舞之蹈之。莫知所自。臣退甘屏處。莫預駿奔。奏薄技于從官之間。敢懷故步。效三祝于封人之請。徒切愚誠。

代謝宮觀表

十年念咎。躋地靡追。一日奉祠。從天而下。孤迹有自新之路。聖朝無終棄之人。恩重難名。感深至泣。中謝。伏念臣猥由寒陋。誤辱眷知。持橐近班。何有論思之益。把麾遠郡。粗殫惠養之勤。鄉關甫遂于歸休。帥闔忽叨于推擇。患生意表。盜起鄰封。調戍卒于屬州。授伍符于籓牧。不虞宿將。反墮姦謀。方騰訟過之章。乃被督師之命。大兵雲集。謂當指日而可擒。醜類靡奔。曾不回戈而內向。力追蹤于山谷。尙假息于朝晡。積既弗成。罪將誰執。七旬未格。莫寬西顧之憂。三褫猶輕。難追南遷之謫。獲歸故里。已佩深仁。自量擯斥之餘。宜在執何之外。敢圖鴻造。憫其垂朽之年。特渙綸言。廩以祝釐之祿。削刊丹籍。叨竊素餐。茲蓋伏遇皇帝陛下。治本隆寬。政先總核。動加矜軫。豈爲匹夫而求全。凡與使令。不以一眚而終廢。俯憐庸懦。曲賜涵容。臣敢不擢髮省愆。銘肌感德。散材無用。深知復玷闕之難。壯志雖衰。尙得效糜捐之報。

